

摘藻堂四庫全書薈要

經部

欽定四庫全書薈要

經部

春秋集傳釋義大成

諸家傳序  
世次

卷一

綱目

詳校官原任侍講臣王燕緒



欽定四庫全書薈要

春秋集傳釋義大成目錄

卷首

序

凡例

綱領

世次

卷一

隱公

卷二

桓公

卷三

莊公

卷四

閔公

卷五

僖公

卷六



文公

卷七

宣公

卷八

成公

卷九

襄公

卷十



昭公

卷十一

定公

卷十二

哀公

臣等謹按春秋集傳釋義大成十二卷元俞  
臯撰臯字心遠新安人泰定間從其鄉經師  
趙良鈞遊良鈞宋末進士授修職郎廣德軍

教授宋亡不仕以春秋教授鄉里臯得其傳以著是書分別三傳是非而補胡氏之未及吳澂稱其恪守所傳通之諸家擇精語當粹然無疵張萱亦以為大旨宗趙良鈞今觀其書雖兼采衆說衷以己意而分別義例一以程朱二家為宗蓋良鈞之學本出程朱者也春秋惟胡氏之傳最行於世而借抒時事往往過激臯能取裁程朱以補其所偏不拘例

亦不廢例不泥傳亦不廢傳庶幾能持其平  
者視他家矜新立異之書固迥不侔矣乾隆  
四十年二月恭校上

總纂官

臣紀昀  
臣陸錫熊  
臣孫士毅

總校

官

臣陸

費

墀

欽定四庫全書薈要卷一千六百九

經部

春秋集傳釋義大成諸家傳序

左氏傳序

春秋者魯史記之名也記事者以事繫日以日繫月以月繫時以時繫年所以紀遠近別同異也故史之所記必表年以首事年有四時故錯舉以為所記之名也周禮有史官掌邦國四方之事達四方之志諸侯亦各有國史大事書之於策小事簡牘而已孟子曰楚謂之檮

杞晉謂之乘而魯謂之春秋其實一也韓宣子適魯見  
易象與魯春秋曰周禮盡在魯矣吾乃今知周公之德  
與周之所以王韓子所見蓋周之舊典禮經也周德既  
衰官失其守上之人不能使春秋昭明赴告策書諸所  
記注多違舊章仲尼因魯史策書成文考其真偽而志  
其典禮上以遵周公之遺制下以明將來之法其教之  
所存文之所害則刊而正之以示勸戒其餘則皆即用  
舊史史有文質辭有詳略不必改也故傳曰其善志又

曰非聖人孰能修之蓋周公之志仲尼從而明之左丘  
明受經於仲尼以為經者不刊之書也故傳或先經以  
始事或後經以終義或依經以辨理或錯經以合異隨  
義而發其例之所重舊史遺文略不盡舉非聖人所修  
之要故也身為國史躬覽載籍必廣記而備言之其文  
緩其旨遠將令學者原始要終尋其枝葉究其所窮優  
而柔之使自求之饜而飫之使自趨之若江海之浸膏  
澤之潤渙然冰釋怡然理順然後為得也其發凡以言

例皆經國之常制周公之垂法史書之舊章仲尼從而修之以成一經之通體其微顯闡幽裁成義類者皆據舊例而發義指行事以正褒貶諸稱書不書先書故書不言不稱書曰之類皆所以起新舊發大義謂之變例然亦有史所不書即以為義者此蓋春秋新意故傳不言凡曲而暢之也其經無義例因行事而言則傳直言其歸趣而已非例也故發傳之體有三而為例之情有五一日微而顯文見於此而起義在彼稱族尊君命舍



族尊夫人梁亡城緣陵之類是也二曰志而晦約言示制推以知例參會不地與謀曰及之類是也三曰婉而成章曲從義訓以示大順諸所諱辟壁假許田之類是也四曰盡而不汙直書其事具文見意丹楹刻桷天王求車齊侯獻捷之類是也五曰懲惡而勸善求名而亡欲蓋而章書齊豹盜三叛人名之類是也推此五體以尋經傳觸類而長之附于二百四十二年行事王道之正人倫之紀備矣或曰春秋以錯文見義若如所論則

經當有事同文異而無其義也先儒所傳皆不其然答  
曰春秋雖以一字為褒貶然皆須數句以成言非如八  
卦之爻可錯綜為六十四也固當依傳以為斷古今言  
左氏春秋者多矣今其遺文可見者十數家大體轉相  
祖述進不得為錯綜經文以盡其變退不守丘明之傳  
於丘明之傳有所不通皆沒而不說而更膚引公羊穀  
梁適足自亂預今所以為異專修丘明之傳以釋經經  
之條貫必出於傳傳之義例總歸諸凡推變例以正褒

貶簡二傳而去異端蓋丘明之志也其有疑錯則備論而闕之以俟後賢然劉子駿創通大義賈景伯父子許惠卿皆先儒之美者也未有穎子嚴者雖淺近亦復名家故特舉劉賈許穎之違以見同異分經之年與傳之年相附比其義類各隨而解之名曰經傳集解又別集諸例及地名譜第歷數相與為部凡四十部十五卷皆顯其異同從而釋之名曰釋例將令學者觀其所聚異同之說釋例詳之也或曰春秋之作左傳及穀梁無明

文說者以為仲尼自衛反魯修春秋立素王丘明為素

臣言公羊者亦云黜周而王魯危行言孫以辟當時之  
害故微其文隱其義公羊經止獲麟而左氏經終孔丘  
卒敢問所安答曰異乎余所聞仲尼曰文王既歿文不  
在茲乎此制作之本意也嘆曰鳳鳥不至河不出圖吾  
已矣夫蓋傷時王之政也麟鳳五靈王者之嘉瑞也今  
麟出非其時虛其應而失其歸此聖人所以為感也絕  
筆於獲麟之一句者所感而起固所以為終也曰然則

春秋何始於魯隱公答曰周平王東周之始王也隱公讓國之賢君也考乎其時則相接言乎其位則列國本乎其始則周公之祚胤也若平王能祈天永命紹開中興隱公能彊宣祖業光啓王室則西周之美可尋文武之迹不隊是故因其歷數附其行事采周之舊以會成王義垂法將來所書之王即平王也所用之歷即周正也所稱之公即魯隱也安在其黜周而王魯乎子曰如有用我者吾其為東周乎此其義也若夫制作之文所

以章往考來情見乎辭言高則旨遠辭約則義微此理之常非隱之也聖人包周身之防既作之後方復隱諱以辟患非所聞也子路欲使門人為臣孔子以為欺天而云仲尼素王丘明素臣又非通論也先儒以為制作三年文成致麟既已妖妄又引經以至仲尼卒亦又近誣據公羊經止獲麟而左氏小邾射不在三叛之數故余以為感麟而作作起獲麟則文止於所起為得其實至於反袂拭面稱吾道窮亦無取焉

# 公羊傳序

昔者孔子有云吾志在春秋行在孝經此二學者聖人之極致治世之要務也傳春秋者非一本據亂而作其中多非常異義可怪之論說者疑惑至有倍經任意反傳違戾者其勢雖問不得不廣是以講誦師言至於百萬猶有不解時加讓嘲辭援引他經失其句讀以無為有甚可閔笑者不可勝記也是以治古學貴文章者謂之俗儒至使賈逵緣隙奮筆以為公羊可奪左氏可興

恨先師觀聽不決多隨二創此世之餘事斯豈非守文  
持論敗績失據之過哉余竊悲之久矣往者略依胡母  
生條例多得其正故遂隱括使就繩墨焉

穀梁傳序

昔周道衰陵乾綱絕紐禮壞樂崩彝倫攸斁弑逆篡盜  
者國有淫縱破義者比肩是以妖災因釁而作民俗染  
化而遷陰陽為之愆度七曜為之盈縮川岳為之崩竭  
鬼神為之疵癘故父子之恩缺則小弁之刺作君臣之



禮廢則桑扈之諷興夫婦之道絕則谷風之篇奏骨肉之親離則角弓之怨彰君子之路塞則白駒之詩賦天垂象見吉凶聖作訓紀成敗欲人君戒愼厥行增修德政蓋誨爾諄諄聽我藐藐履霜堅冰所由者漸四夷交侵華戎同貫幽王以暴虐見禍平王以微弱東遷征伐不由天子之命號令出自權臣之門故兩觀表而臣禮亡朱干設而君權喪下陵上替僭迫理極天下蕩蕩王道盡矣孔子覩滄海之橫流迺喟然而嘆曰文王既歿

文不在茲乎言文王之道喪興之者在已於是就大師而正雅頌因魯史而修春秋列黍離於國風齊王德於邦君所以明其不能復雅政化不足以被羣后也於時則接乎隱公故因茲以託始該二儀之化育贊人道之幽變舉得失以彰黜陟明成敗以著勸誡拯頽綱以紀三五鼓芳風以扇遊塵一字之褒寵踰華袞之贈片言之貶辱過市朝之撻德之所助雖淺必申義之所抑雖貴必屈故附勢匿非者無所逃其罪潛德獨運者無所

隱其名信不易之宏軌百王之通典也先王之道既弘  
麟感化而來應因事備而終篇故絕筆於斯年成天下  
之事業定天下之邪正莫善於春秋春秋之傳有三而  
為經之旨一臧否不同褒貶殊致蓋九流分而微言隱  
異端作而大義乖左氏以鬻拳兵諫為愛君文公納幣  
為用禮穀梁以衛輒拒父為尊祖不納子糾為內惡公  
羊以祭仲廢君為行權妾母稱夫人為合正以兵諫為  
愛君是人主可得而脅也以納幣為用禮是居喪可得

而婚也以拒父為尊祖是為子可得而叛也以不納子  
糾為內惡是仇讎可得而容也以廢君為行權是神器  
可得而闕也以妾母為夫人是嫡庶可得而齊也若此  
之類傷教害義不可得彊通者也凡傳以通經為主經  
以必當為理夫至當無二而三傳殊說庸得不棄其所  
滯擇善而從乎既不俱當則固容俱失若至言幽絕擇  
善靡從庸得不並舍以求宗據理以通經乎雖我之所  
是理未全當安可以得當之難而自絕於希通哉而漢

興以來瓌望碩儒各信所習是非紛錯準裁靡定故有  
父子異同之論石渠分爭之說廢興由於好惡盛衰繼  
之辯訥斯蓋非通方之至理誠君子之所歎息也左氏  
豔而富其失也誣穀梁清而婉其失也短公羊辯而裁  
其失也俗若能富而不誣清而不短裁而不俗則深於  
其道者也故君子之於春秋沒身而已矣升平之末歲  
次大梁先君北蕃迴軫頻駕于吳乃帥門生故吏我兄  
弟子姪研講六籍次及三傳左氏則有服杜之註公羊

則有何嚴之訓釋穀梁傳者雖近十家皆膚淺末學不  
經師匠辭理典據既無可觀又引左氏公羊以解此傳  
文義違反斯害也已於是乃商略名例敷陳疑滯博示  
諸儒同異之說昊天不弔太山其頽匍匐墓次死亡無  
日日月逾邁跂及視息乃與二三學士及諸子弟各記  
所識并言其意業未及終嚴霜夏墜從弟彫落二子泯  
沒天實喪予何痛如之今撰諸子之言各記其姓名名  
曰春秋穀梁傳集解

程子傳序

天之生民必有出類之才起而君長之治之而爭奪息  
道之而生養遂教之而倫理明然後人道立天道成地  
道平二帝而上聖賢世出隨時有作順乎風氣之宜不  
先天以開人各因時而立政暨乎三王迭興三重既備  
子丑寅之建正忠質文之更尚人道備矣天道周矣聖  
王既不復作有天下者雖欲倣古之迹亦私意妄為而  
已事之繆秦以建亥為正道之悖漢專以智力持世豈

復知先王之道也夫子當周之末以聖人之不復作也  
順天應時之治不復有也於是作春秋為百王不易之  
大法所謂考諸三王而不謬建諸天地而不悖質諸鬼  
神而無疑百世以俟聖人而不惑者也先儒之論曰游  
夏不能贊一辭辭不待贊也言不能與於斯耳斯道也  
惟顏子嘗聞之矣行夏之時乘殷之輅服周之冕樂則  
韶舞此其準的也後世以史視春秋謂褒善貶惡而已  
至於經世之大法則不知也春秋大義數十其義雖大



炳如日星乃易見也惟其微辭隱義時措時宜者為難知也或抑或縱或與或奪或進或退或微或顯而得乎義理之安文質之中寬猛之宜是非之公乃制事之權衡揆道之模範也夫觀百物而後識化工之神聚衆材而後知作室之用於一事一義而欲窺聖人之用心非上智不能也故學春秋者必優游涵泳默識心通然後能造其微也後王知春秋之義則雖德非禹湯尚可以法三代之治自秦而下其學不傳予悼夫聖人之志不

明於後世也故作傳以明之俾後之人通其文而求其義得其意而法其用則三代亦可復也是傳也雖未能極聖人之蘊奧庶幾學者得其門而入矣有宋崇寧二年癸未四月乙亥河南程頤正叔序

胡氏傳序

古者列國各有史官掌記時事春秋魯史爾仲尼就加筆削乃史外傳心之要典也而孟氏發明宗旨目為天子之事者周道衰微乾綱解紐亂臣賊子接迹當世人

欲肆而天理滅矣仲尼天理之所在不以為已任而誰  
可五典弗惇已所當叙五禮弗庸已所當秩五服弗章  
已所當命五刑弗用已所當討故曰文王既沒文不在  
茲乎天之將喪斯文也後死者不得與於斯文也天之  
未喪斯文也匡人其如予何聖人以天自處斯文之興  
喪在已而由人乎哉故曰我欲載之空言不如見諸行  
事之深切著明也空言獨能載其理行事然後見其用  
是故假魯史以寓王法撥亂世反之正叙先後之倫而

典自此可惇秩上下之分而禮自此可庸有德者必褒  
而善自此可勸有罪者必貶而惡自此可懲其志存乎  
經世其功配於抑洪水膺戎狄放龍蛇驅虎豹其大要  
則皆天子之事也故曰知我者其惟春秋乎罪我者其  
惟春秋乎知孔子者謂此書遏人欲於橫流存天理於  
既滅為後世慮至深遠也罪孔子者謂無其位而託二  
百四十二年南面之權使亂臣賊子禁其欲而不得肆  
則戚矣是故春秋見諸行事非空言比也公好惡則發

乎詩之情酌今古則貫乎書之事典常典則體乎禮之  
經本忠恕則導乎樂之和著權制則盡乎易之變百王  
之法度萬世之準繩皆在此書故君子以謂五經之有  
春秋猶法律之有斷例也學是經者信窮理之要矣不  
學是經而處大事決大疑能不惑者鮮矣自先聖門人  
以文學名科如游夏尚不能贊一辭蓋立義之精如此  
去聖既遠欲因遺經窺測聖人之用豈易能乎然世有  
先後人心之所同然一爾苟得其所同然者雖越宇宙

若見聖人親炙之也而春秋之權度在我矣近世推隆王氏新說案為國是獨於春秋貢舉不以取士庠序不以設官經筵不以進讀斷國論者無所折衷天下不知所適人欲日長天理日消其效使禍亂日滋莫之遏也噫至此極矣仲尼親手筆削撥亂反正之書亦可以行矣天縱聖學崇信是經乃於斯時奉承詔旨輒不自揆謹述所聞為之說以獻雖微辭奧義或未貫通然尊君父討亂賊闢邪說正人心用夏變夷大法略具庶幾聖

王經世之志小有補云





春秋集傳釋義大成

凡例

一凡孟月例書時正月例書王或事在二月則書春  
王二月事在三月則書王三月事在春則不言月  
無事則書時書首月其有不書蓋缺簡也

一凡王朝公卿例書爵大夫例書字上士中士例書  
名王子則書王子某下士例書人

一凡列國卿大夫一命例書人再命例書名三命例

書氏書名公子公孫則書公子某公孫某四命例  
書字宋卿例書官

一凡朝聘諸國來魯例書來朝其不成禮者止書來  
外諸國相朝例書如魯往諸國例書如魯卿大夫  
士聘他國例書如他國來魯例書使來聘微者止  
書來聘

一凡盟會內為主例書及外為主例書會外之為主  
者必先序歃血例書盟講好例書會衆共為盟例

書同盟此齊伯未成晉伯既衰之時也不成禮者  
例書遇交相命者例書胥命魯往他國盟未前定  
例書會盟前定例書蒞盟他國來魯盟未前定例  
書來盟前定例書使來盟

一凡征伐將尊師衆例書某帥師將尊師少例書某  
伐某魯則止書主將名氏伐某將卑師衆例書某  
師魯則止書師將卑師少例書某人魯則止書伐  
某及某戰不知將帥名氏多寡亦書人君親將例

書爵聲罪致討例書伐潛師掠境例書侵環其城  
邑例書圍抵其國都例書入覆其宗社例書滅移  
其民人例書遷列陳相敵例書戰奇詐取勝例書  
敗殺之無遺例書殲民亂逃散例書潰車徒大崩  
例書敗績屈服歸順例書降欲進而止例書次已  
去而逐例書追用他國師例書以援他國急例書  
救悉虜而俘例書取生擒得之例書獲拘而囚之  
例書執聚兵守之例書戍完其郭郭例書城

一凡魯夫人始逆例書女有姑例書婦入國例書夫人告廟例書至其不書逆者往逆非卿也不書婦無姑也不書氏脫簡也不書至不行告廟禮也並不書者亦缺文也

一凡魯女嫁諸國例書逆書歸來逆非卿則止書歸王姬或王后使魯主婚事者例書逆書歸惟齊人來歸子叔姬夫人姜氏歸于齊乃子被弑而身被出故書來歸歸于以明非奔也

一凡崩薨卒葬天王例書崩魯君及夫人例書薨諸國君合書薨而據其來計謙辭曰某爵某卒故例書卒卿大夫例書卒魯未踰年之君例書卒諸國葬則舉謚來告故例書謚自天王至於列國書崩卒而不書葬者來計而魯不往會也不書卒葬者不來計而魯亦不往也

一凡諸國殺大夫公子例書國微者殺之例書人作亂者殺之例書盜惟晉世子申生宋世子痤被譖

自殺而歸罪於君故書爵

一凡郊禘望雩嘗禘烝皆誌其踰禮非時之失也

一凡大閱治兵蒐狩皆誌其非常非時非地之失也

一凡魯災異大故素無例書有素有而甚例書多非

常例書大

一凡諸國災異大故來告例書某國某災某異聞而知之則止書某災某異

一凡螟螣螽蟃皆以其害稼故書

一凡興作有舊而更之例書新無舊而始為之例書作完修舊城例書城創立新邑或新臺園例書築僖公之南門定公之雉門及兩觀更舊而變其制故書新作

自晉杜氏註左傳始有凡例之說取經之事同辭同者計其數凡若干而不攷其義唐陸氏學於啖趙作纂例之書雖分析詳備然亦未嘗以義言之逮程子為傳分別義例而學者始得聞



焉愚今遵程子說以事同義同辭同者定而為  
例十六條凡書經之事義如此而其辭例如此  
者是所謂例也其有義不同而辭同事同而辭  
不同者則見各事之下非可以例拘也且如殊  
會其辭雖同而其義則不同會王世子而殊會  
是尊之而不敢與抗若曰王世子在是而諸侯  
往會之不敢與世子列也會吳而殊會是抑之  
而不使其抗若曰諸侯自為會而後會吳不使

與諸侯列也又如歸來歸復歸歸字雖同而其義則不同婦人謂嫁曰歸而書來歸則出也諸國君大夫出奔而復則書歸而書復歸則義不當復也天王使宰咺來歸惠公仲子之賵秦人來歸僖公成風之襚此譏其過時始至之失也至於季子來歸齊人來歸鄆謹龜陰之田此又喜其歸異其詞以嘉之也凡此皆辭同而義不同者也又如國君奔一也而內奔書遜弑君一

也而內弑書薨不地殺公子一也而內殺公子  
書刺凡此皆事同而辭不同者又如易田書假  
城虎牢不繫鄭戍虎牢曰鄭因會伐而朝書如  
凡此之類乃程子所謂微辭隱義時措咸宜者  
也是皆不可以例拘也學者誠能熟玩程子傳  
以求其意至於沉潛反復一旦豁然貫通庶乎  
可窺聖人用心之萬一也又奚待愚言之贅云



欽定四庫全書薈要卷一千六百十

經部

程子朱子說春秋綱領

程子曰夫子作春秋為百王不易之大法所謂考諸三王而不謬建諸天地而不悖質諸鬼神而無疑百世以俟聖人而不惑者也

程子曰五經載道春秋聖人之用五經之有春秋猶法律之有斷例也經為斷傳為案以傳攷經之事迹以經別傳之真偽

程子曰觀論語之書而知聖心之安仁書於春秋者無非此理夫子之贊易即其所以修春秋也

程子曰春秋之作不過因魯國之史而兼紀周齊晉宋諸國之事其尊卑大小統屬之序秩然無毫髮之不順盡書治忽得失陵僭賊亂之變森然循乎條理而一之無非法故曰非聖人其誰修之也

程子曰孔子感麟而作春秋或謂不然如何曰春秋不害感麟而作然麟不出春秋豈不作孔子之意蓋亦

有素因此一事故其書之成復以此終大抵須有發  
端處

程子曰春秋乃制事之權衡揆道之模範於一事一義  
而欲窺聖人之用心非上智不能也故學春秋者必  
優游涵泳默識心通然後能造其微也後之人通其  
文而求其義得其義而法其用則三代亦可復也

朱子曰春秋是聖人據史以書其事使人自觀之以為  
鑒戒爾其事則齊桓晉文其義則誅亂臣賊子若欲

求一字以為聖人褒善貶惡專在於是恐非聖人之意

朱子曰孔子作春秋以討亂賊則致治之法垂於萬世是亦一治也當時魯史孔子取而筆削之而其義大明孔子亦何嘗有意用某字使人知勸用某字使人知懼用某字有甚微辭隱義使人曉不得足以褒貶榮辱人來不過如今之史書直書其事善惡瞭然在目觀者知所懲勸故亂臣賊子有所懼而不敢犯爾



朱子曰春秋十二公時各不同如隱桓之時王室新東  
遷號令不行天下星散無主莊僖之時桓文迭伯政  
自諸侯出天下始有統一宣公之時楚莊盛彊主盟  
中國諸侯服齊服晉者亦皆朝楚及成公之世晉悼  
出來整頓楚始退去繼而吳越又彊入來爭伯定哀  
之世政皆自大夫出魯有三家晉有六卿齊有田氏  
宋有華向被他肆意又曰春秋初時天王尚略有戰  
伐之屬到後來都無了只是諸侯抗衡諸侯才不奈

何又被大夫出來做大夫才不奈何又被陪臣出來  
做

朱子曰春秋固當以類例相通然亦先須隨事觀理反  
復涵泳令胸次開濶義理通貫方有意味自非理明  
義精則止是較得失考同異心緒轉離與讀史傳撫  
故實無以異大抵此經簡奧立說雖易貫通為難聖  
人之言平易中有精深處不可穿鑿求速成又不可  
苟且間看過

朱子曰左氏曾見國史考事頗精只是不知大義好以  
成敗論人都不折之以理之是非公羊穀梁考事甚  
踈然義理却勝於左氏胡傳大義正亦有牽彊處然  
議論有開合精神



欽定四庫全書蒼要卷一千六百十一

經部

春秋世次圖說

十三伯

齊桓公

宋襄公

晉文公

襄公 靈公 成公 景公 厲公

悼公

平公 昭公 頃公 定公

伯之名何由而起乎當王道流行侯國受職未始有也  
自東遷日久王澤壅而下權張正理微而力爭起徒有  
振王之號而不循敬君之節此伯之名所由立歟齊桓  
公實肇其事故以桓公為始然而有伯非美事也春秋  
何以與之乎蓋黜其過而錄其功耳且以齊伯觀之桓  
公以方伯之國任賢良之佐驟合諸侯以紀綱中夏於  
波流風靡之中使王室既卑而稍尊四夷既抗而稍息  
諸侯羣起而略定故春秋不能不錄其功然而約束諸

侯幾於改物盟會征討皆專行之使王室愈卑王迹愈  
熄故春秋不能不黜其過功過不相掩此伯者之事也  
逮夫宋襄公繼齊桓之後伯雖未成而盟會必先序宋  
者春秋與之以內中夏也楚雖盛彊而不得主盟會者  
不以外制內也自此四年之後晉文公繼起城濮一戰  
闕夷夏之盛衰王畿兩盟平周室之內難惜其享國之  
日淺雖成功速而不能久也自襄公以後世主夏盟春  
秋之拳拳與晉者實憂天下之切也至於靈成景厲之

世晉伯稍衰而於盟會必先序晉者豈非與之以伯乎  
及悼公之興八年之間九合諸侯雖數與楚遇而不與  
之戰推誠待人鄭不敢畔者二十四年亦庶幾桓文之  
績矣然而楚雖弱而吳方張其末也以士匄偃主盟  
則政在大夫世變愈下矣此又伯權之大壞也至於平  
昭頃定愈降愈壞列國之不若也然終乎黃池之會春  
秋猶以伯與晉則雖晉不能伯而春秋猶未絕晉也蓋  
非為晉也為王室也為天下也愚故謂十三伯云



# 周世次

平王  
宜白

太子

洩父

桓王

林

莊王

佗

僖王

胡齊

惠王

閼

襄王

鄭

頃王

士臣

定王

瑜

匡王

班

簡王

夷

靈王

泄心

景王

貴

敬王

句

悼王

猛

周本黃帝之裔姬姓后稷教民稼穡有功始封自后

稷至文王十五世始稱西伯武王末年始代商有天

下武王至平王十三世而東遷平王四十九年魯隱

公元年也春秋始於此又自敬王至赧王十世為秦

所滅自武王至赧王三十六世通八百六十七年四

百年在春秋之前二百四十二年在春秋之中二百

二十五年在春秋之後后稷始封於邠在今奉元路

長安縣故邠城公劉都邠亦作豳在今鳳翔府路邠

州太王徙都岐在今鳳翔府路岐山縣文武都鄠鄠  
在今奉元路長安縣鄠在靈臺鄉鄠在昆明池平王  
東遷于成王所營之洛邑又名王城在今河南府治  
敬王都狄泉亦名王城在今河南府東二十餘里故  
洛城也

# 魯世次

隱公

息姑

桓公

軌

莊公

同

閔公

啟方

僖公

申

文公

興

宣公

倭

成公

黑肱

襄公

午

昭公

稠

定公

宋


哀公

蔣

魯姬姓侯爵出自周文王第四子周公旦佐文武成  
王有大勲成王命為冢宰食邑扶風雍縣東北在今  
陝西行省鳳翔府扶風縣後封其子伯禽於曲阜是  
為魯侯自伯禽至隱公十三世而春秋作自隱公至  
哀公十二世哀公十四年獲麟春秋終又自哀公至  
頃公九世為楚所滅共三十四世曲阜漢為豫州刺  
史所領魯國唐為山南西道兗州曲阜縣宋為京東  
西路襲慶府仙源縣今山東道濟寧路兗州曲阜縣

東有故魯城

# 齊世次



齊姜姓侯爵出自炎帝裔孫伯夷佐禹平水土有功

賜曰姜氏謂之呂侯國在南陽宛縣在今河南府路

南陽府商末太公呂望佐武王定天下有功封於營

丘是為齊侯自太公至僖公十二世僖公九年魯隱

公元年也自僖公至簡公十三世簡公四年魯哀公

十四年也又三世至康公為田氏所篡共二十八世

營丘亦名臨淄漢為青州刺史所領北海郡唐為山

南東道青州臨淄縣宋為京東東路青州臨淄縣在



今山東道益都路臨淄縣

晉世次

翼  
謂之  
先晉

鄂侯  
郤

哀侯  
光

小子侯  
晉侯緡

曲沃  
謂之  
新晉

武公  
稱  
獻公  
詭諸

文公  
重耳  
襄公  
驩

惠公  
夷吾  
懷公  
圉

悼公  
周

厲公  
州蒲

景公  
孺

成公  
黑臀

靈公  
夷臯

定公  
干

頃公  
去疾


昭公  
夷

平公  
彪

晉姬姓侯爵出自周武王少子成王母弟唐叔虞始封於唐又遷太原南有晉水亦曰晉陽後改稱晉穆侯之子文侯徙都翼因謂之翼次子成師分封於曲沃謂之曲沃自叔虞至鄂侯十三世鄂侯二年魯隱公元年也鄂侯至晉侯緡四世魯莊公十六年曲沃武公滅翼先晉遂亡曲沃出自穆侯少子名成師穆侯之孫昭侯封成師于曲沃曰桓叔成師之子曰莊伯莊伯之子始稱武公殺晉侯緡而滅翼周莊王命之

為晉侯徙都絳是謂新晉自武公至定公十五世定公三十一年魯哀公十四年也又六世韓魏趙篡晉而分其地兩晉共三十八世太原漢為并州刺史所領太原郡唐為河東道并州宋為河東路太原府晉陽縣在今河東山西道太原路平晉縣亦有故唐城曲沃在今平陽路絳州曲沃縣翼在今平陽路絳州翼城縣絳即絳州城景公遷新田亦謂之絳在今平陽路絳州絳縣

# 宋世次



宋子姓公爵出自商王帝乙之長庶子啓食采於微

謂之微子在今懷孟路武涉縣武王克商封武庚於

殷武庚畔成王誅武庚封微子於商丘為宋公以奉

殷祀自微子至穆公十三世穆公七年隱公元年也

自穆公至景公十三世景公三十六年魯哀公十四


年也又自景公至偃王七世為齊魏楚所滅自微子

至偃王共三十三世商丘漢為豫州刺史所領梁國

睢陽縣唐為河南道歸德軍宋為南京應天府在今

河南府路歸德府

# 衛世次






衛姬姓侯爵出自周文王幼子康叔武王分殷餘民  
封康叔於河淇之間是為衛侯邑於商墟自康叔至  
桓公十三世桓公十三年魯隱公元年也自桓公至  
出公十五世紀內除黔牟戴公云十三世出公五  
十三年魯哀公十四年也出公之後又十二世為秦  
所滅共三十八世商墟漢為司隸校尉所領河內汲  
郡朝歌縣唐為河北道衛州衛縣宋為河北西路衛  
州衛縣在今河東山西道衛輝路新鄉縣故朝歌城

文公徙楚丘在今東昌路曹州楚丘縣成公遷帝丘  
在今東昌路濮州觀城縣

# 鄭世次



鄭姬姓伯爵出自周厲王少子友宣王封友於王畿

內咸林之地是為鄭桓公子武公從平王東遷後取

虢鄆之地定都溱洧而施舊號於新邑是為新鄭自

桓公至莊公三世莊公二十三年魯隱公元年也自

莊公至聲公除子嬰計十三世聲公二十年魯哀公


十四年也聲公之後又八世為韓所滅共二十三世

咸林在今奉元路華州鄭縣溱洧鄭都漢為司隸校

尉所領河南郡滎陽宛縣唐為河南道鄭州新鄭縣


宋為京西北路鄭州新鄭縣在今汴梁路鈞州新鄭縣

# 曹世次



曹姬姓伯爵出自周文子曹叔振鐸至桓公十一世  
桓公十五年魯隱公元年也自桓公至伯陽十五世  
魯哀公八年宋滅曹共二十六世漢為兗州刺史所  
領濟陰郡定陶縣唐為河東道曹州定陶縣宋為京  
東西路興仁府定陶縣在今東昌路曹州定陶縣

# 陳世次





陳嬀姓公爵後國削弱自改侯爵出自帝舜之後至  
閼父為周武王陶正武王以元女大姬嫁其子胡公  
滿而封諸大皞之墟自胡公至桓公十一世桓公二  
十三年魯隱公元年也自桓公至閼公十二世閼公  
二十一年魯哀公十四年也當魯昭公八年楚滅陳  
後五年復又自春秋後三年閼公為楚所滅連陳佗  
共二十四世大皞之墟漢為豫州刺史所領潁川郡  
唐為河南道陳州陳縣宋為京西北路陳州宛丘縣

在今汴梁路陳州宛丘縣

# 蔡世次



蔡姬姓侯爵出自周文王子叔度武王封叔度於蔡  
自叔度至宣侯九世宣侯二十八年魯隱公元年也  
自宣侯至成侯十二世成侯十年魯哀公十四年也  
成侯之後又三世為楚所滅共二十三世蔡都漢為  
豫州刺史所領汝南郡唐為河南道蔡州上蔡縣宋  
為京西北路蔡州上蔡縣在今汴梁路汝寧府上蔡  
縣後遷州來在今淮西道安豐路霍丘縣

北燕世次

穆侯  
宣侯  
桓侯


莊公  
襄公  
桓公  
成公  
昭公  
武公  
文公

懿公  
惠公  
悼公  
恭公  
平公  
簡公  
獻公

北燕姬姓伯爵出自周同姓功臣召公奭佐文武有功為周太保食采於召在今奉元路盤屋縣成王封其子於幽薊是為燕伯自召公至穆侯九世穆侯七年魯隱公元年也自穆侯至獻公十七世獻公十二年魯哀公十四年也獻公之後十二世為秦所滅共三十八世燕薊漢為幽州刺史所領涿郡薊縣唐為河北道幽州盧龍軍節度范陽郡薊縣宋初屬遼為燕京析津縣金滅遼以歸宋改名燕山府尋復屬金

改名永安遷都之改縣名大興今大都路大興縣有  
古燕城

秦世次





秦嬴姓伯爵出自伯益十九世孫非子為周孝王養  
馬汧渭間受封為附庸傳六世至襄公有功於平王  
始受岐豐之地列為諸侯是為秦伯襄公子文公四  
十四年魯隱公元年也自文公至悼公十五世悼公  
十年魯哀公十四年也悼公後九世至昭襄王始滅  
周自昭襄王至子嬰六世為漢所滅共二十七世非  
子始封之地漢為梁州刺史所領天水郡隴西縣秦  
亭唐為隴右道秦州隴城縣宋為陝西秦鳳路秦州

隴城縣在今鞏昌路秦州成紀縣故始昌城文公都  
岐隴在今鞏昌路隴州德公遷雍在今奉元路興平  
縣孝公始都咸陽西漢建都長安為京兆東漢置雍  
州屬司隸校尉所領京兆郡咸陽縣唐都長安為京  
兆咸陽縣宋為陝西永興軍路京兆府咸陽縣在今  
奉元路咸陽故城始皇阿房宮地在咸陽縣二世望  
夷宮地在涇陽縣如今之奉元城乃前漢及西魏後  
周隋唐所都之地也

# 楚世次

堵敖

穆王

商臣

康王

昭

郟敖

武王

通

文王

賁

成王

康

共王

審

靈王

圓

公子

平王

棄疾  
亦名居

昭王

軫  
亦名壬

惠王

章

楚芊姓子爵出自祝融之後鬻熊有功於周文武成

王封其孫熊繹於荊蠻邑丹陽城自熊繹至熊通十

三世改曰楚僭號稱王是為楚武王武王十九年魯

隱公元年也自武王至惠王十二世惠王八年魯哀

公十四年也惠王之後又十世為秦所滅共三十五

世丹陽漢為荊州刺史所領武陵郡唐為淮南道夔

州宋為荊湖北路歸州今湖北道辰州路歸州有故

丹陽城後徙枝江亦曰丹陽在今江陵路枝江縣文

王徙郢今江陵路江陵縣故郢城平王城郢在今江  
陵路安陸府襄王遷都在今襄城路宜城縣

吳世次

壽夢

諸樊

餘祭

餘昧

王僚

闔閭

夫差

吳姬姓子爵出自周太王長子太伯與弟仲雍遜王  
季位逃之荊蠻太伯卒仲雍嗣立武王封周章為吳  
子自太伯至壽夢十九世當魯成公六年始見春秋  
自壽夢至夫差七世夫差十五年魯哀公十四年也  
春秋終後八年為越所滅共二十六世吳都漢為吳  
國後改吳郡屬揚州刺史所領唐為江南浙西道蘇  
州宋為兩浙路平江府在今浙西道平江路府治

杞世次

武公

德公

桓公

姑容

孝公

丐

文公

益姑

平公

郁釐

悼公

成

隱公

乞

僖公

過

閔公

維



杞姒姓公爵後國削弱自改伯爵又改子爵出自夏  
禹之後裔周封二王後得東樓公封於雍丘以奉禹  
祀自東樓公至武公八世武公十一年魯隱公元年  
也自武公至閔公十世閔公六年魯哀公十四年也  
閔公之後又六世為楚所滅共二十四世雍丘漢為  
兗州刺史所領陳留郡雍丘縣唐為河南道汴州雍  
丘縣宋為開封府雍丘縣在今河南江北行省汴梁  
路杞縣

# 滕世次

滕侯穀

宣侯嬰齊

孝侯轍

昭侯元

文侯壽

成侯原

悼侯寧

頃侯結

隱侯虞母

滕姬姓侯爵後國削弱自改子爵出自周文王子叔  
繡始封自叔繡至宣侯十一世魯隱公七年始見春  
秋自宣侯至隱侯八世而春秋終又自隱侯後六世  
為齊所滅共二十四世滕國漢為豫州刺史所領沛  
國公丘縣唐為山南道徐州滕縣宋為京東西路徐  
州滕縣在今山東道益都路滕州滕縣

許世次

穆公

新臣

僖公

業

昭公

錫我

靈公

出

悼公

買

斯

斯

元公

成

子結

許姜姓男爵出自堯四岳伯夷之後周武王封其裔  
文叔於許十一世至穆公魯隱公十一年始見春秋  
自穆公至子結八世子結元年魯哀公十四年也後  
為楚所滅許都漢為豫州刺史所領潁川郡許昌縣  
獻帝都許唐為河南道許州長社縣在今河南江北  
行省汴梁路許州

邾世次

儀父  
瑣  
文公  
定公  
宣公  
悼公  
莊公  
隱公

邾曹姓本附庸國後自改子爵出自陸終之後周武  
王封其裔孫曹挾於邾不知世次至儀父魯隱公元  
年見春秋自儀父至隱公八世隱公二十五年魯哀  
公十四年也後為魯所滅改曰鄒邑漢為豫州刺史  
所領魯國鄒縣唐為山南西道兗州鄒縣宋為京東  
西路襲慶府鄒縣在今山東道益都路滕州鄒縣

莒世次

茲公

紀公

渠公

黎公

展公

著公

庚公

郊公

莒子

共公



嬴姓子爵出自少昊之後周武王封茲輿期於莒自  
茲輿期至茲丕公十一世始見春秋庚輿而下微不  
復見又自庚輿之後至四世為楚所滅共二十一世  
莒漢為青州刺史所領高密郡莒縣唐為山南東道  
密州莒縣宋為京東東路安化軍莒縣今山東道益  
都路莒州有故莒子城

薛世次

薛侯

獻侯

襄公

薛伯比


惠公

任姓侯爵後國削弱自改伯爵黃帝之後奚仲始封至仲虺居薛為湯左相周武王復封其後為薛侯不知世次至薛侯來朝始見春秋於其朝會可考者五君而已薛國宋以前並屬徐州今沛縣之北徐州之西是其故地

春秋諸國以左傳考之計一百二十四國而其世紀之可知者二十國而已其餘諸國都爵姓並見釋義今不再錄最難攷者舒有羣舒故有舒鳩舒

庸舒蓼越總稱也又有於越南越百越狄總稱也  
又有北狄長狄赤狄白狄戎總稱也又有徐戎山  
戎犬戎陸渾戎驪戎戎蠻凡此之類皆難攷者蓋  
今去古甚遠不敢臆說闕其疑可也

# 魯公族



臧孫氏

世次

公子彊

僖伯

臧孫達

哀伯

鉏辰

文伯

許

宣叔

紇

武仲

出奔齊

賈

無後

為

賜

昭伯

倉

毀孟子者

疇

會

賓如

石

仲孫氏 亦曰孟孫氏

慶父

公孫敖

穆伯

穀

文伯

難

惠叔

仲孫蔑

獻子

佗

子服氏

後為

速

莊子

捷

子服椒

惠伯

羯

孝伯

孺子秩

子服回

昭伯

矍

僖子

子服何

景伯

何忌

懿子

閔


敬叔

後為南宮氏

玁

武伯

叔孫氏





# 季孫氏

公季友 成季

齊管氏

季孫行父 文子

宿 武子

公彌

後為公鉏氏

頃伯

隱侯伯

公鉏極

公若

公甫靖 後為公甫氏

歆 文伯

寤


紇 悼子

意如 平子

斯 桓子

肥 康子

# 子服氏




魯公族皆世為卿大夫獨臧孫氏三桓氏子叔氏  
可考餘不可考者並不錄

三傳漢諸儒傳授

公羊傳

董仲舒  
胡毋生



穀 梁 傳

魯申公  
瑕丘公

江博士

皓星公

榮廣

胡常

丁姓

周慶

蔡千秋

蕭秉

申章昌

尹更始

翁君

劉向

尹咸

翟方進

房鳳

左 氏 傳

張倉  
賈誼

張敞

劉公子

貫公

貫長卿

張禹

尹更始

尹咸

劉歆

胡常

賈護

陳欽

翟方進

公羊傳自董仲舒胡毋生傳之已而大盛儒者往往以斷國論穀梁氏魯申公傳之至宣帝時始立學官左氏張蒼賈誼傳之而張敞劉公子皆習焉至平帝時始立學官此二家最後出故不能盛大也

|  |  |  |  |  |  |  |  |
|--|--|--|--|--|--|--|--|
|  |  |  |  |  |  |  |  |
|--|--|--|--|--|--|--|--|



欽定四庫全書薈要卷一千六百十二

經部

春秋集傳釋義大成卷一

元 俞臯 撰

隱公

名息姑惠公子母聲子在位十一年為公子翬所弑第桓公立謚法不尸其位曰隱

程子曰春秋魯史記之名也夫子之道既不行於天下於是因魯春秋立百王不易之大法平王東遷在位五十一年卒不能興復先王之業王道絕矣孟子曰王者之迹熄而詩亡詩亡然後春秋作適當隱公之初故始於隱公朱子曰春秋者記事者必表年以首事年有四時故錯舉以為所記之名也王者之迹熄謂平王東遷而政

教號令不及於天下也詩亡謂黍離降為國風而雅亡也孔子作春秋定天下之邪正為百王之大法啖氏曰幽厲雖衰雅未為風平王之初人習餘化及化變風移凌遲日久若格以太平之政則比屋不可勝誅故斷自平王之末而以隱公為始左氏傳惠公元妃孟子孟子卒繼室以聲子生隱公宋武公生仲子仲子生而有文在其手曰為魯夫人故仲子歸于我生桓公而惠公薨是以隱公立而奉之○胡氏傳孟子曰王者之迹熄而詩亡詩亡然後春秋作今按邶鄘而下多春秋時詩也而謂詩亡然後春秋作何也自黍離降為國風天下無復有雅而王者之詩亡矣春秋作於隱公適當雅亡之後詩之所終春秋之所以始也隱公之所始平王之所以終也又按小雅正月刺幽王也而曰赫赫宗周褒姒威之逮魯孝公之末幽王已為犬戎所斃惠公初年周

既東矣春秋不作於孝公惠公者東遷之始流風遺俗猶有存者鄭武公入為司徒善於其職則猶用賢也晉侯捍王于艱錫之秬鬯則猶有誥命也王曰其歸視爾師寧爾邦則諸侯猶來朝也義和之薨諡曰文侯則列國猶有請也及平王在位日久不能自強於政治棄其九族葛藟有終遠兄弟之刺不撫其民周人有束薪蒲楚之譏至其晚年失道滋甚乃以天王之尊下賄諸侯之妾於是三綱淪九法斁人望絕矣祭伯非王命而私交武氏子非王命而求賄以致鄭莊公為卿士用捨不出於公而以虛言欺之至其怨王奪政則有交質之舉若敵國然王綱解紐委靡不振皆自平王失之夫婦人倫之本朝廷風化之源平王子母適冢正后親遭褒如之難廢黜播遷而宗國顛覆亦可省矣又不是懲而賄人寵妾是拔本塞源自滅之也春秋於此蓋有不得已焉者托始於隱其傷周室陵遲雖有繼世之王亦不能以復興矣孔

子嘗曰如有用我者其為東周乎此春秋撥亂世反之正尊一王之法也抑嘗求之隱桓之間政自諸侯出而猶未恣橫小國未有被執遭滅而邦國尚知有王室焉及莊僖而下伯政代興盟會征伐皆伯者司之甚則執其君墟其社稷於王政乎何有又降而政在大夫則吳越盛陪臣彊變日極矣故備論之以著篇于

巳未 元年春王正月

元者始也元年隱公之始年也春天時也古史未有書時者獨魯史書四

時冠月故錯舉其二名曰春秋也王正月周正建子之月也夫子憂王道之不行於是因魯史而筆削之所以遇人欲存天理立百王不易之法也程子曰元年者隱公之始年也春者天時也正月者王之所建也周正非春假天時以立義耳書春王正月者若曰上奉天時下承王正云爾董仲舒所謂道之大原出於天求端於天

是也堯之大政所先者欽若昊天茲可見矣王者所行  
必本於天以正天下而下之奉王政乃所以事天也明  
此義則知王與天同其大而人道立矣春秋天子之事  
平王之時王道絕矣假周以正王法故書曰春王正月  
然後是非褒貶二百四十二年之事皆天理也朱子曰  
據周禮有正歲有正月則周實是元改作春正月夫子  
所謂行夏之時只是為他不順欲改從建寅又荅吳晦  
叔書曰春秋是魯史合用時王之月項氏曰春非春正  
月非正月也非而書之者何時與月必如是而後為正  
也不以王冠春者王改正不改時也書王冠正月者所  
以見時王之月與時相違也見時正之相違所以教後  
世之無相違也愚觀項氏此說發明程子朱子之意至  
○甚明白而諸說之謬可不待辯而自明學者宜詳味之  
位者八桓文宣成襄昭定哀也春秋之義莫重乎端本  
正始故即位者尤聖人之所謹也古者諸侯雖繼世然

必稟命於天子而後立莫敢專也平王以降天子之命不行於諸侯諸侯之嗣皆專立而無所請命如後文成襄昭哀皆受國於先君而不請命於天子者也隱公獨不書即位者入春秋之始聖人即以王法奪之而大義舉矣若文成襄昭哀亦不書乎則與夫內復不受於先君者無以為別故五公書之言猶繼正而有所受之也如莊閔僖皆內無所受上無所承爾至於桓宣定三公則著其自立也桓公則弑隱而立宣公則公子遂殺惡及視而立定公則由季氏立之苟不書其即位則無以明其自立之罪也胡氏曰春秋首黜隱公以明大法蓋本程子之言也左氏以為不書即位攝也蓋既稱元年生稱公死稱薨何攝之有公羊以為成公意又曰桓幼而貴隱長而卑蓋隱桓皆庶子何卑貴之有隱讓桓為不正聖人何以成其意乎穀梁雖發明讓桓不正之意固是然未若程子之論深切著明也○左氏傳元年春王周正月不書即位攝也公羊傳元年者何君之始年

也春者何歲之始也王者孰謂謂文王也曷為先言王  
而後言正月王正月也何言乎王正月大一統也公何  
以不言即位成公意也何成乎公之意公將平國而反  
之桓曷為反之桓桓幼而貴隱長而卑其為尊卑也微  
國人莫知隱長又賢諸大夫扳隱而立之隱於是焉而  
辭立則未知桓之將必得立也且如桓立則恐諸大夫  
之不能相幼君也故凡隱之立為桓立也隱長又賢何  
以不宜立立適以長不以賢立子以貴不以長桓何以  
貴母貴也母貴則子何以貴子以母貴母以子貴穀梁  
傳雖無事必舉正月謹始也公何以不言即位成公志  
也馬成之言君之不取為公也君之不取為公何也將  
以讓桓也讓桓正乎曰不正春秋成人之美不成人之  
惡隱不正而成之何也將以惡桓也其惡桓何也隱將  
讓而桓弑之則桓惡矣桓弑而隱讓則隱善矣善則其  
不正焉何也春秋貴義而不貴惠信道而不信邪孝子  
揚父之美不揚父之惡先君之欲與桓非正也邪也雖

然既勝其邪心以與隱矣已探先君之邪志而遂以與桓則是成父之惡也兄弟天倫也為子受之父為諸侯受之君已廢天倫而忘君父以行小惠曰小道也若隱者可謂輕千乘之國蹈道則未也胡氏傳即位之一年必稱元年者明人君之用大哉乾元萬物資始天之用也至哉坤元萬物資生地之用也成位乎其中則與天地參故體元者人主之職而調元者宰相之事元即仁也仁人心也春秋深明其用當自貴者始故治國先正其心以正朝廷與百官遠近莫不一於正矣春秋立文兼述作按舜典紀元日商訓稱元祀此經書元年所謂祖二帝明三王述而不作者也正次王王次春乃立法創制裁自聖心無所述於人者非史冊之舊文矣按左氏曰王周正月周人以建子為歲首則冬十有一月是也前乎周者以丑為正其書始即位曰惟元祀十有二月則知月不易也後乎周者以亥為正其書始建國曰元年冬十月則知時不易也建子非春亦明矣乃以夏



時冠周月何哉聖人語顏回以為邦則曰行夏之時作  
春秋以經世則曰春王正月此見諸行事之驗也或曰  
非天子不議禮仲尼有聖德無其位而改正朔可乎曰  
有是言也不曰春秋天子之事乎以夏時冠月垂法後  
世以周正紀事示無其位不敢自專也其旨微矣加王  
於正者公羊言大一統是也國君逾年改元必行告廟  
之禮國史主記時政必書即位之事而隱公闕焉是仲  
尼削之也古者諸侯繼世襲封則內必有所承爵位土  
田受之天子則上必有所稟內不承國於先君上不稟  
命於天子諸大夫扳己以立而遂立焉是與爭亂造端  
而篡弑所由起也春秋首絀隱公  
以明大法父子君臣之倫正矣

### 三月公及邾儀父盟

于蔑

諸公隱公也張氏曰魯侯爵而稱公者臣子之詞也

封附庸後改子爵國在今益都路滕州鄒縣邾子克字  
儀父附庸之君稱字同王朝大夫也盟歃血約誓也蔑

杜氏曰魯地姑蔑也在今大名路開州濮陽縣瑕丘程  
子曰盟誓所以結信出於人情先王所不禁也後世累  
盟而不信則罪也諸侯交相盟誓亂世之事也凡盟內  
為主稱及外為主稱會在魯地雖外為主亦稱及彼來  
而及之也兩國以上則稱會彼盟而往會之也○左氏  
傳邾子克也未王命故不書爵曰儀父貴之也公攝位  
而欲求好於邾故為蔑之盟公羊傳及者何與也會及  
暨皆與也曷為或言會或言及或言暨會猶最也及猶  
汲汲也暨猶暨暨也及我欲之暨不得已也儀父者何  
邾婁之君也何以名字也曷為稱字褒之也曷為褒之  
為其與公盟也與公盟者衆矣曷為獨褒乎此因其可  
褒而褒之此其為可褒奈何漸進也昧者何地期也穀  
梁傳及者何內為志焉爾儀字也父猶傳也男子之美  
稱也其不言邾子何也邾之上古微未爵命於周也不  
日其盟渝也昧地名也胡氏傳魯侯爵而其君稱公此  
臣子之詞春秋從周之文而不革者也我所欲曰及邾

者魯之附庸儀父其君之字也何以稱字中國之附庸也王朝大夫例稱字列國之命大夫例稱字諸侯之兄弟例稱字中國之附庸例稱字其常也聖人按是非定褒貶則有例當稱字或黜而書名例當稱人或進而書字其變也常者道之正變者道之中春秋大義公天下以講信修睦為事而刑牲歃血要質鬼神則非所貴也故盟有弗獲己者汲汲欲馬惡隱公之私也或言褒其首與公盟而書字失之矣

夏五月鄭伯

克段于鄆

鄭姬姓伯爵國在今汴梁路鈞州新鄭縣鄭伯莊公寤生也君親將例書爵克勝也段名

莊公弟共叔段也再命例書名鄆杜氏曰鄭地今汴梁路鄆陵縣程子曰鄭伯失為君之道無兄弟之義故稱鄭伯而不言弟克勝也言勝見段之彊使之彊所以致其惡也不書奔義不係於奔也○左氏傳初鄭武公娶于申曰武姜生莊公及共叔段莊公寤生驚姜氏故名曰寤生遂惡之愛共叔段欲立之亟請於武公公弗許

及莊公即位為之請制公曰制巖邑也虢叔死焉他邑  
唯命請京使居之謂之京城太叔祭仲曰都城過百雉  
國之害也先王之制大都不過參國之一中五之一小  
九之一今京不度非制也君將不堪公曰姜氏欲之焉  
辟害對曰姜氏何厭之有不如早為之所無使滋蔓蔓  
難圖也蔓草猶不可除况君之寵弟乎公曰多行不義  
必自斃子姑待之既而太叔命西鄙北鄙貳於己公子  
呂曰國不堪貳君將若之何欲與太叔臣請事之若弗  
與則請除之無生民心公曰無庸將自及太叔又收貳  
以為己邑至於廩延子封曰可矣厚將得衆公曰不義  
不暱厚將崩太叔完聚繕甲兵具卒乘將襲鄭夫人將  
啟之公聞其期曰可矣命子封帥車二百乘以伐京京  
叛太叔段段入于鄆公伐諸鄆五月辛丑太叔出奔共  
書曰鄭伯克段于鄆段不弟故不言弟如二君故曰克  
稱鄭伯譏失教也謂之鄭志不言出奔難之也遂寘姜  
氏于城穎而誓之曰不及黃泉無相見也既而悔之穎

考叔為潁谷封人聞之有獻於公公賜之食食捨肉公問之對曰小人有母皆嘗小人之食矣未嘗君之羹請以遺之公曰爾有母遺繫我獨無潁考叔曰敢問何謂也公語之故且告之悔對曰君何患焉若闕地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂為母子如初君子曰潁考叔純孝也愛其母施及莊公詩曰孝子不匱永錫爾類其是之謂乎公羊傳克之者何殺之也殺之則曷為謂之克大鄭伯之惡也曷為大鄭伯之惡母欲立之己殺之如勿與而已矣段者何鄭伯之弟也何以不稱弟當國也其地何當國也齊人殺無知何以不地在內也在內雖當國不地也不當國雖在外亦不地也穀梁傳克者何能也何能也能殺也何以不言殺見段之有徒衆也段鄭伯弟也何以知其為弟也殺世子母弟目君以其目君知其為弟也段弟也而弗謂弟公子也而弗謂公子貶之也段失子弟之道矣賤段而

甚鄭伯也何甚乎鄭伯甚鄭伯之處心積慮成於殺也  
于駢遠也猶曰取之其母之懷中而殺之云爾甚之也  
然則為鄭伯者宜奈何緩追逸賊親親之道也胡氏傳  
用兵大事也必君臣合謀而後動則當稱國命公子呂  
為主帥則當稱將出車二百乘則當稱師三者咸無稱  
焉而專自鄭伯是罪之在伯也猶以為未足又書曰克  
段于駢克者力勝之詞不稱弟路人也于駢操之為已  
感矣夫君親無將段將以弟篡兄以臣伐君必誅之罪  
也而莊公特不勝其母焉耳曷為縱釋叔段移於莊公  
舉法若是失輕重哉曰姜氏當武公存之時常欲立段  
矣及公既沒姜以國君嫡母主乎內段以寵弟多才居  
乎外國人又悅而歸之恐其終將軋己為後患也故受  
之大邑而不為之所縱使失道以至於亂然後以叛逆  
討之則國人不敢從姜氏不敢主而大叔屬籍當絕不  
可復居父母之邦此鄭伯之志也王政以善養人推其  
所為使百姓興於仁而不偷也況以惡養天倫使陷於

罪因以翦之乎春秋推見至隱首誅其意以正人  
心示天下為公不可以私亂也垂訓之義大矣 秋七

月天王使宰咺來歸惠公仲子之賵天王周平王也宰

夫也三命例書氏書名惠公魯君隱公父也薨葬在春  
秋之前仲子惠公妾桓公母也非夫人故不書卒葬喪  
事贈車馬曰賵書惠公仲子者兼之也賵惠公則失之  
緩賵仲子則亂嫡庶蕪賵尤為失道程子曰諸侯無再  
娶仲子不得為夫人故不稱夫人不書卒葬又案左氏  
傳曰惠公元妃孟子宋武公生仲子仲子歸于魯生桓  
公則仲子乃惠公妾桓公母也穀梁曰惠公母孝公妾  
臆說也蓋因文公九年秦人歸僖公成風之襚而成風  
乃僖公之母也穀梁緣此亦以仲子為惠公母殊不知  
此蕪惠公而賵彼蕪僖公之襚非云其母也左氏又以  
仲子子氏為一人而曰豫凶事亦非也啖氏曰諸侯母  
在天子寧有生歸其賵乎不辯菽麥者猶不當爾況乎

王乎是亦非子氏也且子氏乃隱公夫人而隱公母乃  
聲子公羊胡氏謂仲子乃桓公母其說是矣吳先生曰  
宰姓咺名三命例書氏書名非貶也聖人據事直書而  
義自見何待名宰然後為貶乎趙先生曰諸家謂尊仲  
子者惠公尊成風者僖公故書惠公仲子僖公成風此  
說亦失之鑿周因仲子之喪遂兼惠公而贈秦因成風  
之喪遂兼僖公而祔故直書以見其非若惠公已尊仲  
子為夫人何以不書卒葬乎○左氏傳緩且子氏未薨  
故名天子七月而葬同軌畢至諸侯五月同盟至大夫  
三月同位至士踰月外姻至贈死不及尸弔生不及哀  
豫凶事非禮也○公羊傳宰者何官也咺者何名也曷  
為以官氏宰士也惠公者何隱之考也仲子者何桓之  
母也何以不稱夫人桓未君也贈者何喪事有贈贈者  
蓋以馬以乘馬束帛車馬曰贈貨財曰賻衣被曰祔桓未  
君則諸侯曷為來賻之隱為桓立故以桓母之喪告于  
諸侯然則何言爾成公意也其言來何不及事也其言



惠公仲子何兼之兼之非禮也何以不言及仲子仲子微也穀梁傳母以子氏仲子者何惠公之母孝公之妾也禮贈人之母則可贈人之妾則不可君子以其可辭受之其志不及事也贈者何也乘馬曰贈衣衾曰襚貝玉曰含錢財曰賻○胡氏傳上古應時稱號故其名三變春秋以天自處創制立名繫王於天為萬世法其義備矣冢宰稱宰咺者名也王朝公卿書官大夫書字上士中士書名下士書人咺位六卿之長而名之何也仲子惠公之妾爾以天王之尊下賻諸侯之妾是加冠於屨人道之大經拂矣天王紀法之宗也六卿紀法之守也議紀法而修諸朝廷之上則與聞其謀頒紀法而行諸邦國之間則專掌其事而承命以賻諸侯之妾是壞法亂紀自王朝始也春秋重嫡妾之分故特貶而書名以見宰之非宰矣或曰僖公之母成風亦莊公妾也其卒也王使榮叔歸含且賻其葬也王使召伯來會葬下賻諸侯之妾而名其宰榮召何以書字而不名也於前

贈仲子則名冢宰於後葬九月及宋人盟于宿

宋子姓公爵國

成風王不稱天其法嚴矣在今歸德府宿風姓男爵國在今東平路須城縣故無鹽城書及內之微者宋人亦一命之微者也宿國也宋無宿邑穀梁傳誤地以國宿亦預焉參盟之端見矣程子曰稱及稱人皆非卿也○左氏傳惠公之季年敗宋師于黃公立而求成焉九月及宋人盟于宿始通也公羊傳孰及之內之微者也穀梁傳及者何內卑者也宋人外卑者也卑者之盟不日宿邑名也胡氏傳內稱及外稱人皆微者其地以國宿亦與焉微者盟會不志于春秋此其志者有宿國之君也凡書盟者惡之或曰周官有司盟掌盟載之法詛祝作其詞玉府共其器戎右役其事太史藏其約蘇公亦曰出此三物以詛爾斯夫盟以結信出於人情先王猶不禁也而謂凡書盟者惡之可乎曰盟以結信非先王所欲而不禁逮德下哀欲禁之而不克也春秋之時會而歃血其載果掌於司盟

猶不以爲善也又況私相要誓慢鬼神犯刑政以成傾危之習哉今魯既及儀父宋人盟矣尋自叛之信安在乎凡書盟冬十有二月祭伯來祭姬姓伯爵國在今汴梁路鄭州管城縣故祭

者惡之也城祭伯畿內諸侯爲王卿者來來朝魯也不書朝不成朝禮也程子曰當時諸侯不修朝覲之禮失人臣之義王所當治也祭伯爲王臣不能輔正典刑而反與之交又來朝之故不與其朝以明其罪先儒有王臣無外交之說甚非也若天下有道諸侯順軌豈有內外之限其相交好乃常禮也然委官守而遠相朝無是道也周禮所謂世相朝者謂隣國也○左氏傳非王命也公羊傳祭伯者何天子之大夫也何以不稱使奔也奔則曷爲不言奔王者無外言奔則有外之辭也○穀梁傳來者來朝也其弗謂朝何也褒內諸侯非有天子之命不得出會諸侯不正其外交故弗與朝也聘弓鏃矢不出竟場束脩之肉不行竟中有至尊尊者不貳之也胡氏傳案

左氏曰非王命也祭伯畿內諸侯為王卿士來朝于魯而直書曰來不與其朝也人臣義無私交大夫非君命不越境所以然者杜朋黨之原為後世事君而有貳心者之明戒也惟此義不行然後有藉外權如繆留之語諱宣惠者交私議論如莊助之結淮南者倚彊藩為援以脅制朝廷如唐廬攜之於高駢崔胤之於宣武昭緯之於邠岐者矣經於內臣朝聘告赴皆貶而不與正其本也豈有誣上行私自植其黨之患哉公子益師卒

公子魯孝公子名益師公子三命例書公子某不日缺文也三傳之言不同左氏公不與小斂之說尤繆程子曰諸侯之卿必受命於天子當時不復請命故諸侯之卿皆不書官不與其為卿也稱公子以公子故使為卿也惟宋王者後得命官故獨宋卿書官卿者佐君以治國其卒國之大事故事書於此見君臣之義矣或不日因舊史也古之史記事簡略日月或不備春秋因舊史有可損而不能益也○左氏傳衆父卒公不與

小斂故不書日○公羊傳何以不日遠也所見異辭所  
聞異辭所傳聞異辭○穀梁傳大夫日卒正也不日卒  
惡也○胡氏傳凡公子公孫登名於史冊貴戚之卿也  
不書官者故侍講程頤以謂後皆稱氏不與其以公子  
故而自為卿也古者諸侯大夫皆命於天子卿卒必書  
此春秋貴大臣之意其不日公羊以為遠然公子疆遠  
矣而書日則非遠也穀梁以為惡然公子牙季孫意如  
惡矣而書日則非惡也左氏以為公不與小斂然公孫  
教卒于外而公在內叔孫婼卒于內而公在外不與小  
斂明矣而書日左氏之說亦非也其見恩數之有厚薄  
歟

庚申二年春公會戎于潛

戎氏羌之別種也今濟南路濟陽縣有戎城蓋徐州之戎也會

講好而不盟也潛杜氏曰魯地鄭氏曰廬州府治元名  
潛山然廬州乃舒國非魯地也當在今安慶路潛山程

子曰周室既衰蠻夷猾夏有散居中國者方伯大國明  
大義而攘斥之義也其餘列國慎固封守可也若與和  
好以免侵暴非所謂戎狄是膺乃所以長其僭亂也故  
春秋華夷之辯尤謹公之會戎非義也○左氏傳修惠  
公之好戎請盟公辭○穀梁傳會者外為主焉爾知者  
慮義者行仁者守有此三者然後可以出會會戎危公  
也○胡氏傳戎狄舉號外之也天無所不覆地無所不  
戴天子與天地參者也春秋天子之事何獨外戎狄乎  
曰戎狄之有善惡猶君子之有小人內君子外小人為  
泰內小外君子為否春秋聖人傾否之書內中國而  
外四夷使之各安其所也無不覆載者王德之體內中  
國而外四夷者王道之用是故以諸夏而事戎狄致金  
繒之奉屈已事人其策不可施也以戎狄而朝諸夏或  
狎主齊盟亂常失序其禮不可行也以羌胡而居塞內  
無出入之防日復一日必將滋蔓萌猾夏之階其禍不  
可長也為此說者其知內外之旨而明於馭戎之道正

朔所不加也奚會同  
之有書會戎譏之也  
夏五月莒人入向  
莒已姓子爵國在今益都路莒

州莒縣莒人將卑師少也以兵抵其國都例書入向爵  
姓闕杜氏曰龍亢縣東南有向城在今益都路沂州左

氏公羊以為國穀梁以為魯邑蓋附庸也程子曰天下  
有道禮樂征伐自天子出春秋之時諸侯擅相侵伐興

兵以侵伐人其罪著矣春秋直書其事而責常在被侵  
伐者蓋彼加兵於己則當引咎或自下諭之以禮義不

得免焉則固其封疆告于天子方伯若忿而與之戰則  
以與戰者為主處已絕亂之道也書莒人微者也凡將

尊師衆曰某帥師將尊師少曰某伐某將卑師衆曰某  
師將卑師少曰某人不知衆寡將帥名氏亦曰某人書

入入其國也侵人之境且曰暴况入人國乎左氏傳莒  
子娶于向向姜不安莒而歸夏莒人入向以姜氏還公

羊傳入者何得而不居也穀梁無駭帥師入極無駭魯  
傳入者內弗受也向我邑也

命例書名師師將尊師衆也極魯附庸小國姓爵地俱闕不可彊為之說程子曰古者卿皆命於天子春秋之時諸侯自命也賜族者則書族不書族者未賜也賜族者皆命之世為卿者也左氏傳司空無駭入極費庠父勝之公羊傳無駭者何展無駭也何以不氏貶曷為貶疾始滅也始滅昉於此乎前此矣前此則曷為始乎此託始焉爾曷為託始焉爾春秋之始也此滅也其言入何內大惡諱也穀梁傳入者內弗受也極國也苟焉以入人為志者人亦入之矣不稱氏者滅同姓貶也胡氏傳左氏曰莒子娶于向向姜不安莒而歸莒人入向以姜氏還此所謂案也春秋書曰莒人入向此所謂斷也以事言之入者造其國都以義言之入者逆而不順莒稱人小國也無駭不氏未賜族也其書帥師用大衆也非王命而入人國邑逞其私意見諸侯之不臣也擅興而征討不加焉見天王之不

秋八月庚辰公及戎盟于君也據事直書義自見矣



唐

書公及魯為主也戎即會于潛之戎也唐杜氏曰魯地在今濟寧路濟州魚臺縣即棠也程子曰戎猾夏

而與之盟非義也○左氏傳秋盟于唐復修戎好也胡

氏傳案費誓稱淮夷徐戎此蓋徐州之戎久居中國在

魯之東郊者也韓愈氏言春秋謹嚴君子以為深得其

旨所謂謹嚴者何謹乎莫謹於華夷之辨矣中國而為

戎則戎之蠻荆猾夏則膺之此春秋之旨也而與戎狄

歃血以約盟非義矣是故成於日者必以事繫日而前

此盟于蔑則不日盟于宿則不日後此盟于密則不日

盟于石門則不日獨盟于唐而書日者謹之也後世乃

有結戎狄以許婚而擇配不以德如西漢之於匈奴約

戎狄以求利而華夏被其毒如肅宗之於回紇信戎狄

以與盟而臣主蒙其耻如德宗之於尚結贊雖九月紀

悔於終亦將奚及春秋謹唐之盟垂戒遠矣九月紀

履綸來逆女

紀姜姓侯爵國在今益都路臨朐縣東壽光縣西履綸紀大夫名也再命例書名公

穀胡氏皆曰大夫獨左氏作裂繻以為卿臆說也程子曰非命卿皆書名以君命來逆夫人也在魯故稱女內女嫁為諸侯夫人則書逆書歸明重事也來逆非卿則書歸而已見其禮之薄也先儒皆謂諸侯當親迎親迎者適他國以逆婦者乎非惟諸侯卿大夫皆然詩稱文王親迎于渭未嘗出疆也○左氏傳卿為君逆也公羊傳紀履綸者何紀大夫也何以不稱使婚禮不稱主人然則曷稱稱父兄師友宋公使公孫壽來納幣則其稱主人何辭窮也辭窮者何無母也然則紀有母乎曰有有則何以不稱毋母不通也外逆女不書此何以書譏何譏爾譏始不親迎也始不親迎昉於此乎前此矣前此則曷為始乎此託始焉爾曷為託始焉爾春秋之始也女曷為或稱女或稱婦或稱夫人女在其國稱女在塗稱婦入國稱夫人穀梁傳逆女親者也使大夫非正也以國氏者為其來交接於我故君子進之也胡氏傳案

穀梁子逆女親者也使大夫非正也魯哀公問冕而親  
迎不亦重乎孔子對曰合二姓之好以為宗廟社稷主  
君何謂已重乎文定厥祥親迎于渭造舟為梁不顯其  
光則世子而親迎也韓侯娶妻蹶父之子韓侯止于  
蹶之里則諸侯而親迎也有夫婦然後有父子有父子  
然後有君臣夫婦人倫之本也逆女必親使大夫非正  
也入春秋之始名宰咺歸賵以譏亂法書履綸冬十月  
逆女以志變常衆妾之分定矣大婚之禮嚴矣

伯姬歸于紀

伯姬魯惠公女也婦人謂嫁曰歸歸于紀  
嫁紀侯也朱子曰婦人內夫家故以嫁為

歸程子曰送之者雖公子公孫非卿則不書公羊傳伯  
姬者何內女也其言歸何婦人謂嫁曰歸穀梁傳禮婦  
人謂嫁曰歸反曰來歸從人者也婦人在家制於父既  
嫁制於夫夫死從長子婦人不專行必有從也伯姬歸  
于紀此其如專行之辭何也曰非專行也吾伯姬歸于  
紀故志之也其不言使何也逆之道微無足道焉爾

紀子伯莒子盟于密

密杜氏曰莒邑今益都路密州也伯左氏作帛程子曰缺文也當云

紀侯某子某伯盟于密左氏附會作帛杜氏以為裂繻之字春秋無大夫在諸侯上者公羊穀梁皆作伯據此宜為斷簡缺文也○左氏傳魯故也○公羊傳紀子伯者何無聞焉爾穀梁傳或曰紀子伯莒子而與之盟或曰年同爵同故紀子以伯先也胡氏傳凡闕文有斷以大義削之而非闕者有本據舊史因之而不能益者亦有先儒傳受承誤而不敢增者如隱不書即位桓不書王昭葬成風王不書天吳楚之君卒不書葬之類皆斷以大義削之而非闕也甲戌己丑夏五紀子伯莒子盟于密之類或曰先儒傳授承誤而不敢增者也闕疑而慎言其餘可矣必

十有二月乙卯夫人子氏薨

夫人隱公夫人

也杜氏以為桓公母蓋桓公母乃仲子非夫人也公羊以為隱公母然隱公母乃聲子亦非夫人也宜以穀梁

為是程子曰隱公夫人也薨上墜之聲婦人從夫者也  
公在故不書葬於此見夫婦之義矣○公羊傳夫人子  
氏者何隱公之母也何以不書葬成公意也何成乎公  
之意子將不終為君故母亦不終為夫人也穀梁傳夫  
人薨不地夫人者隱之妻也卒而不書葬夫人之義從  
君者也胡氏傳案穀梁子曰夫人子氏者隱之妻也卒  
而不書葬夫人之義從君者也邦君之妻國人稱之曰  
小君卒則書薨以明齊也先卒則不書葬以明順也有  
夫婦然後有父子有父子然後有君臣夫婦人倫之本  
也入春秋之始於子氏書薨不書葬明示大倫苟知其  
義則夫夫婦婦鄭人伐衛鄭人將卑師少也聲罪致討  
而家道正矣鄭人伐衛曰伐衛姬姓侯爵國在今衛  
輝路汲縣故朝歌城程子曰衛服故不戰衛服可免矣  
鄭之檀興戎王法所不容也○左氏傳討公孫滑之亂  
也胡氏傳案左氏鄭共叔之亂公孫滑出奔衛衛人為  
之伐鄭取廩延至是鄭人伐衛討滑之亂也凡兵聲罪

致討曰伐潛師入境曰侵兩兵相接曰戰繯其城邑曰圍造其國都曰徙其朝市曰遷毀其宗廟社稷曰滅詭道而勝之曰敗悉虜而俘之曰取輕行而掩之曰襲已去而躡之曰追聚兵而守之曰戍以弱假彊而能左右之曰以皆誌其事實以明輕重內兵事敗曰戰書滅曰取特婉其辭為君隱也征伐天子之大權今鄭無王命雖有言可執亦王法所禁況於修怨乎不書戰者程氏以為衛已服也衛服則可免矣此義施於伐而不書戰皆可通矣

辛酉 三年春王二月己巳日有食之

不書朔缺文也程子曰月王月也事在二

月則書王二月在三月則書王三月無事則書時書首月蓋有事則道在事無事則存天時王朔天時備則歲功成王道存則人理立春秋之大義也日有食之有食之者也更不必推求何者也太陽君象也而被侵食君

道所忌然有常度災而非異也星辰陵厯亦然朱子曰  
厯法周天三百六十五度四分度之一左旋於地一晝  
一夜則其行一周而又過一度日月皆右行於天一晝  
一夜則日行一度月行十三度十九分度之七故日一  
歲而一周天月二十九日有奇而一周天又遯及於日  
而與之會一歲凡十二會方會則月光都盡而為晦已  
會則月光復蘇而為朔朔後晦前各十五日日月相對  
則月光正滿而為望晦朔而日月之合東西同度南北  
同道則月揜日而日為之食是皆有常度矣然王者修德  
則月亢日而月為之食是皆有常度矣然王者修德行  
政用賢去姦能使陽盛足以勝陰陰衰不能侵陽則日  
月之行雖或當食而月常避日故其遲速高下必有參  
差而不正相合不正相對者所以當食而不食也若國  
無政不用善使臣子背君父妾婦乘其夫小人陵君子  
上下之制置則陰盛陽微當食必食雖曰行有常度而  
實為非常之變矣○公羊傳何以書記異也日食則曷

為或日或不日或言朔或不言朔曰某月某日朔日有食之者食正朔也其或日或不日或失之前或失之後失之前者朔在前也失之後者朔在後也穀梁傳言日不言朔食晦日也其日有食之何也吐者外壤食者內壤闕然不見其壤有食之者也有內辭也或外辭也有食之者內於日也其不言食之者何也知其不可知知也胡氏傳經書日食三十六去之十有餘歲而精厯算者所能致也其行有常度矣然每食必書示後世治厯明時之法也有常度則災而非異矣然每食必書示後世遇災而懼之意也日者衆陽之宗人君之表而有食之災咎象也克謹天戒則雖有其象而無其應弗克畏天災咎之來必矣凡經所書者或妾婦乘其夫或臣子背君父或政權在臣下倫常舛網紀弛皆陽微陰盛之證也是故十月之交詩人以刺日有食之春秋必書以戒人君不可忽天象也

### 三月庚戌天王崩

周平王崩太子洩父先平王卒孫林立是為桓



王程子曰崩上隆之形四海之內皆當奔赴魯君不往惡極罪大不可勝誅不書而自見也左氏傳壬戌崩赴以庚戌故書之公羊傳何以不書葬天子記崩不記葬必其時也諸侯記卒記葬必其事有天子存不得必其時也曷為或言崩或言薨天子曰崩諸侯曰薨大夫曰卒士曰不祿穀梁傳高曰崩厚曰崩尊曰崩天子之崩以尊也其崩之何也以其在民上故崩之其不名何也大上故不名也胡氏傳崩者上隆之形春秋歷十有三王桓襄匡簡景志崩志葬者赴告及魯往會之也平惠定靈志崩不志葬者赴告雖及魯不會也莊僖頃崩葬皆不志者王室不告魯亦不往也諸侯為天王服斬衰禮當以所聞先後而奔喪今平王崩周人來赴而隱公不往是無君也其罪應誅不書而自見矣或曰萬國至衆也封疆至重也天王之喪不得越境以奔而修服於國卿供弔送之禮訖葬卒哭而除喪禮乎案周書康王之誥太保率西方諸侯入應門左畢公率東方諸侯入

應門右再拜趨出王反喪服此奔成王之喪者安得以為修服於國而可乎故周人有喪魯人亦有喪周人往予謂使人可也魯人不往謂當親之者不可使人代也諸侯歲時或朝覲於京師或會同於方岳或從兵革征討之事越境踰時不以為難何獨難於奔喪而薄君臣始終存歿之義哉大非先王之禮失春秋之義矣夏

四月辛卯尹氏卒

尹氏周大夫也左氏作君氏以此為聲子且曰為公故曰君氏若此則成風

亦當書君氏疑其說謬公殺胡氏皆謂尹氏周大夫也趙氏曰公羊譏世卿之說為是程子曰尹氏王之世卿古者使以德爵以功世祿而不世官是以俊傑在位庶績咸熙及周之衰士皆世官政由是敗尹氏世為王官故其卒書曰尹氏見其世繼也○左氏傳君氏卒聲子也不赴于諸侯不反哭于寢不祔于姑故不曰薨不稱夫人故不言葬不書姓為公故曰君氏公羊傳尹氏者何天子之大夫也其稱尹氏何貶曷為貶譏世卿世卿

非禮也外大夫不卒此何以卒天王崩諸侯之主也穀  
梁傳尹氏者何也天子之大夫也外大夫不卒此何以  
卒之也於天子之崩為魯主故隱而卒之胡氏傳尹氏  
天子大夫世執朝權為周階亂家父所刺東國之均不  
平謂何者是也因其告喪與立子朝以朝奔楚皆以氏  
書者志世鄉非禮為後鑒也或曰世鄉非禮裳裳者華  
何以作乎曰功臣之世世其祿世鄉之官嗣其位祿以  
報功也故其世可延位以尊賢也故其官當擇官不擇  
人世授之柄黨與既衆威福下移大姦根據而莫除人  
主孤立而無助國不亡幸爾春秋於周書尹氏武氏仍  
叔之子於魯書季友仲遂皆志其秋武氏子來求賻武  
非禮也公羊子此說必有所受矣

子周大夫武氏之子也書武氏與尹氏之義同贈喪以  
貨財曰賻程子曰武氏王之卿士稱武氏見其世官平  
王崩諸侯不供其喪故武氏遣其子徵求於四國書之  
以見天子失道諸侯不臣之甚也○左氏傳王未葬也

公羊傳武氏子者何天子之大夫也其稱武氏子何譏  
何譏爾父卒子未命也何以不稱使當喪未君也武氏  
子來求賻何以書譏何譏爾喪事無求求賻非禮也蓋  
通于下穀梁傳武氏子者何也天子之大夫也天子之  
大夫其稱武氏子何也未畢喪孤未爵未爵使之非正  
也其不言使何也無君也歸死者曰賵歸生者曰賻曰  
歸之者正也求之者非正也周雖不求魯不可以不歸  
魯雖不歸周不可以求之求之為言得不得未可知之  
辭也交譏之胡氏傳武氏子天子之大夫何以不稱使  
當喪未君非王命也嗣子定位於初喪其曰未君何也  
古者君薨諒陰百官總已聽於冢宰三年夫百官總已  
以聽則是攝行軍國之事也以非王命而不稱使春秋  
之旨微矣於以謹天下之通喪而嚴君臣之名分也夫  
賻以貨財則生者所須索也君取於臣不言求而曰求  
賻求車求金皆著天王之失八月庚辰宋公和卒宋穆  
道也上失其道則下不臣矣

和兄宣公之子與夷立是為殤公張氏曰卒自外錄從  
赴也愚故謂據其來赴謙辭曰某爵某卒也程子曰吉  
凶慶弔講好修睦隣國之常禮人情所當然諸侯之卒  
與國之大故來告則書○左氏傳宋穆公疾召大司馬  
孔父而屬殤公焉曰先君舍與夷而立寡人寡人弗敢  
忘若以大夫之靈得保首領以沒先君若問與夷其將  
何辭以對請子奉之以主社稷寡人雖死亦無悔焉對  
曰羣臣願奉馮也公曰不可先君以寡人為賢使主社  
稷若棄德不讓是廢先君之舉也豈曰能賢光昭先君  
之令德可不務乎吾子其無廢先君之功使公子馮出  
居于鄭八月庚辰宋穆公卒殤公即位君子曰宋宣公  
可謂知人矣立穆公其子饗之命以義夫商頌曰殷受  
命咸宜百祿是荷其是之謂乎穀梁傳諸侯日卒正也  
胡氏傳外諸侯卒國史承告而後書聖人皆存而弗削  
曷為弗削春秋天子之事也古者諸侯之邦交間問殷  
聘而世相朝蓋王事相從則有和好之情及告終易代

則有弔恤之禮是諸侯所以睦隣國也周制王哭諸侯則大宗伯為上相司服為王制總麻宰夫掌邦之弔事戒令與其弊器財用是王者所以懷諸侯也凡諸侯卒皆存弗削而交隣國待諸侯之義見矣卒而或日或不日者何謹則書日慢則書時其大致然也卒而或名或不名者何會盟則名於載書聘問則名於簡牘未嘗會盟聘問而無所證者雖使至告喪其名亦不可得而知矣凡此類因舊史而不革者也諸侯曰薨大夫曰卒五等邦君何以書卒夫子作春秋則有草而不因者周室東遷諸侯放恣專享其國而上不請命聖人奉天討以正王法則有貶黜之刑矣因其告喪特書曰卒不與其為諸侯也故曰知我者其惟春秋乎罪我者其惟春秋乎

平冬十有二月齊侯鄭伯盟于石門

齊姜姓侯爵國在今益都路臨淄縣

石門杜氏曰齊地濟南臨邑縣濟水之門在今濟南路此蓋特盟也程子曰天下無王諸侯不守信義數相盟

誓所以長亂也故外諸侯盟來告則書之陳氏曰書齊鄭盟于石門以志諸侯之合至定公七年書齊鄭盟于鹹以志諸侯之散○左氏傳尋盧之盟也胡氏傳夫盟會常事也何以書在春秋之亂世常事也於聖人之王法則非常也有虞氏未施信於民而民信夏后氏未施敬於民而民敬殷人作誓而民始畔周人作會而民始疑子曰大道之行與三代之英丘未之逮也而有志焉諸侯會盟來告則書而弗削者其諸以是為非常典而有志於天下為公之世

**癸未葬宋穆公**

始死未謚赴以名故書名葬則

舉謚來告故書謚張氏曰葬自內錄往會則書程子曰諸侯告喪魯往會葬則書春秋之時皆不請而私謚稱私謚所以罪其臣子也○公羊傳葬者曷為或日或不日不及時而日渴葬也不及時而不日慢葬也過時而日隱之也過時而不日謂之不能葬也當時而不日正也當時而日危不得葬也此當時何危爾宣公謂繆公

曰以吾愛與夷則不若愛女以為社稷宗廟主則與夷不若女盍終為君矣宣公死穆公立繆公逐其二子莊公馮與左師勃曰爾為吾子生母相見死母相哭與夷復曰先君之所為不與臣國而納國乎君者以君可以為社稷宗廟主也今君逐君之二子而將致國乎與夷此非先君之意也且使子而可逐則先君其逐臣矣繆公曰先君之不爾逐可知矣吾立乎此攝也終致國乎與夷莊公馮弑與夷故君子大居正宋之禍宣公為之也穀梁傳曰葬故也危不得葬也胡氏傳外諸侯葬其事則因魯會而書其義則聖人或存或削曷為或存或削春秋天子之事也傳稱諸侯五月而葬同盟至同盟謂同方岳之盟者其生講會同之好其沒有葬送之禮是諸侯所以睦隣國也案周制有職喪掌諸侯之喪禮涖其禁令序其事凡諸侯及諸臣葬於墓者則家人授之兆為之蹕而均其禁是王者所以懷諸侯也外諸侯葬或存或削而交隣國待諸侯之義見矣葬而或日或



不日者何備則書日略則書時其大致然也卒而或葬或不葬者何有怠於禮而不葬者有弱其君而不葬者有討其賊而不葬者有諱其辱而不葬者有治其罪而不葬者有避其號而不葬者宋殤齊昭告亂書弑矣而經不書葬是討其賊而不葬者也晉主夏盟在景公時告喪書日矣而經不書葬是諱其辱而不葬者也魯宋盟會未嘗不同而三世不葬是治其罪而不葬者也吳楚之君書卒者十亦有親送於西門之外者矣而經不書葬是避其號而不葬者也怠於禮而不往弱其君而不會無其事闕其文魯史之舊也討其賊而不葬諱其辱而不葬治其罪而不葬避其號而不葬聖人所削春秋之法也故曰知我者其惟春秋乎

壬戌四年春王二月莒人伐杞取牟婁

悉虜而俘例書取杞如姓公爵夏之

後也後國削弱自改伯爵又改子爵攷其始封與陳宋同當是公爵國在今汴梁路杞縣牟婁杜氏曰杞邑鄭氏曰杞縣有婁鄉程子曰諸侯土地有所受之伐其罪而專取其土惡又甚焉王法所當誅也○公羊傳牟婁者何杞之邑也外取邑不書此何以書疾始取邑也穀梁傳言伐言取所惡也諸侯相伐取地於是始故謹而志之也胡氏傳取者收奪之名牟婁杞邑也聲罪伐人而彊奪其土故特書曰取以著其惡或曰諸侯土地上受之天王下傳之先祖所以守宗廟之典籍也聖王不作諸侯放恣彊者多兼數圻弱者日以侵削當是時有取其故地者夫豈不可然僖公常取濟西田矣成公嘗取汶陽田矣亦書曰取何也苟不請於天王以正疆理而擅兵爭奪雖取本邑與奪人之有者無以異春秋之義不以亂易亂故亦書曰取正其本之意也上二年莒人擅興入向而天討不加焉戊申衛州吁弑其君完至是伐國取邑其暴益肆矣

戊申衛州吁弑其君完

州吁

衛莊公庶子名也再命例書名弒朱子曰下殺上也完桓公名也內弒君則書薨不地諱國惡也外弒君則直

書以罪之程子曰自古篡弒多公族蓋自謂先君子孫可以為君國人亦以為然而奉之春秋於此明大義以

示萬世故春秋之初弒君者多不稱公子公孫蓋身為大惡自絕於先君矣宣復得為先君子孫也古者公族

刑死則無服况弒君乎大義既明於初矣其後弒立者皆以屬稱或見其以親而寵之太過任之太重以至於

亂或見其天屬之親反為寇讎立義各不同也春秋大率所書事同則辭同後人因謂之例然有事同而辭異

者蓋有義非可例拘也○左氏傳初衛莊公娶于齊東宮得臣之妹曰莊姜美而無子衛人所為賦碩人也又

娶于陳曰厲嬀生孝伯早死其娣戴嬀生桓公莊姜以為己子公子州吁嬖人之子也有寵而好兵公弗禁莊

姜惡之石碏諫曰臣聞愛子教之以義方弗納於邪驕奢淫佚所自邪也四者之來寵祿過也將立州吁乃定

之矣若猶未也階之為禍夫寵而不驕驕而不能降降而不憾憾而能矜者鮮矣且夫賤妨貴少陵長遠間親新間舊小加大淫破義所謂六逆也君義臣行父慈子孝兄愛弟敬所謂六順也去順效逆所以速禍也君人者將禍是務去而速之無乃不可乎弗聽具子厚與州吁遊禁之不可桓公立乃老至是衛州吁弑桓公而自立公與宋公為會將尋宿之盟未及期衛人來告亂公羊傳曷為以國氏當國也穀梁傳大夫弑其君以國氏者嫌也弑而代之也胡氏傳此衛公子州吁也而削其屬籍特以國氏者罪莊公不待之以公子之道使預聞政事主兵權而當國也以公子之道待州吁教以義方弗納于邪不以賤妨貴少陵長則桓公之位定矣亂何由作州吁有寵好兵而公弗禁石碯盡言極諫而公弗從是不待以公子之道使預聞政事主兵權而當國也春秋之旨在於端本清源以衛詩綠衣諸篇考之所謂前有讒而不見後有賊而不知者莊公是也其不稱公子

而以國氏著後世為人君父者之戒爾故傳有之  
曰為人君父而不通春秋之義者必蒙首惡之名夏公

及宋公遇于清

遇兩君相見而不行朝會之禮也清杜氏曰衛地在今東昌路濮州臨清縣程

子曰諸侯相見而不行朝會之禮如道路之相遇故書  
曰遇非周禮冬見曰遇之遇也胡氏謂凡書遇者惡其  
無人君相見之禮也蓋本程子之意公羊傳遇者何不  
期也一君出一君要之也穀梁傳及者內為志焉爾遇  
者志相得也胡氏傳遇者草次之期古者遇禮不期而  
會以明造次亦有恭肅之心春秋書遇私為之約自比  
於不期而遇者直欲簡其禮爾簡略慢易無國君之禮  
則莫適主矣故志內之期者三而皆書及若曰以此及  
彼然也志外之遇者四而皆以爵若曰以尊及卑然也  
其意以為莫適主者異於古之不期而會矣故凡書遇  
者皆惡其無人  
君相見之禮也宋公陳侯蔡人衛人伐鄭  
宋公陳侯君親將也蔡人

衛人將卑師少也陳嬀姓公爵後國削弱自改侯爵國  
在今汴梁路陳州宛丘縣蔡姬姓侯爵國在今汴梁路  
汝寧府上蔡縣宋主兵伐鄭討公子馮也程子曰宋以  
公子馮在鄭故與諸侯伐之也樓諸侯以伐鄭固為罪  
矣而衛弑其君天下所當誅也乃與修好而同伐人其  
惡甚矣○左氏傳宋殤公之即位也公子馮出奔鄭鄭  
人欲納之及衛州吁立將修先君之怨於鄭而求寵於  
諸侯以和其民使告於宋曰君若伐鄭以除君害君為  
主敝邑以賦與陳蔡從則衛國之願也宋人許之於是  
陳蔡方睦於衛故宋公陳侯蔡人衛人伐鄭圍其東門  
五日而還公問於衆仲曰衛州吁其成乎對曰臣聞以  
德和民不聞以亂以亂猶治絲而棼之也夫州吁阻兵  
而安忍阻兵無衆安忍無親衆叛親離難以濟矣夫兵  
猶火也弗戢將自焚也夫州吁弑其君而虐用其民於  
是乎不務令德而欲以亂成必不免矣○胡氏傳春秋  
之法誅首惡興是役者首謀在衛而以宋主兵何也前

書州吁弑君其罪已極至是阻兵修怨勿論可也而隣境諸侯聞衛之有大變也可但已乎田常弑簡公孔子沐浴而朝告於哀公請討之公曰告夫三子者子曰以吾從大夫之後不敢不告也之三子告不可子曰以吾先發而後聞可矣宋殤不恤衛有弑君之難欲定州吁而從其邪說是肆人欲滅天理非人之所為也故以宋公為首諸國為從示誅亂臣討賊子必先治其黨與之法也此義行為惡者孤矣故

秋翬帥師會宋公陳侯蔡

曰春秋成而亂臣賊子懼

人衛人伐鄭

翬魯公子名再命為大夫者再命例書名故不稱公子宋主兵故書會伐程子曰宋

虐用其民衛當誅之賊而與之同伐人其罪均矣再序四國重言其罪也左氏以為再伐妄也翬不稱公子弑逆之人積其彊惡非一朝一夕辨之宜早故去其公子隱公不能辨是以為禍○左氏傳秋諸侯復伐鄭宋公

使來乞師公辭之羽父請以師會之公弗許固請而行  
故書曰輦帥師疾之也諸侯之師敗鄭徒兵取其禾而  
還公羊傳輦者何公子輦也何以不稱公子敗曷為敗  
與弑公也其與弑公奈何公子輦諂乎隱公謂隱公曰  
百姓安子諸侯說子盍終為君矣隱曰吾否吾使修塗  
裘吾將老焉公子輦恐若其言聞乎桓於是謂桓曰吾  
為子口隱矣隱曰吾不反也桓曰然則奈何曰請作難  
弑隱公於鐘巫之祭焉弑隱公也穀梁傳輦者何也公  
子輦也其不稱公子何也貶之也何為貶之也與于弑  
公故貶也胡氏傳案左氏諸侯謀伐鄭宋公使來乞師  
公辭之羽父請以師會之公弗許固請而行易曰履霜  
堅冰至履霜陰始凝也馴致其道至堅冰也臣弑其君  
子弑其父非一朝一夕之故其所由來者漸矣由辨之  
不早辨也宋人來乞師而公辭之羽父請以師會而公  
弗許其辭而弗許義也輦以不義彊其君固請而行無  
君之心兆矣夫公子公孫升為貴戚之鄉者其植根膠



固難御於異姓之卿況輦已使主兵而方命乎隱公不能辨之於早罷其兵權猶使之帥師也是以及鐘巫之

禍春秋於此去其公子以謹履霜之戒春秋立義至精詞極簡嚴而不贅若曰輦帥師會伐鄭豈不白乎再序

四國何其詞費不憚煩也言之重詞之復其中必有大美惡焉四國合黨輦復會師同伐無罪之邦欲定弑君

之賊惡之極也言之不足而再言聖人之情見矣天地造物化工運其神春秋討賊聖筆寫其意再序四國而

誅討亂臣九月衛人殺州吁于濮衛人衛國之人也殺之法嚴矣州吁討其弑君也濮

杜氏曰陳地水名鄭氏曰濮水在曹衛之間程子曰稱衛人衆詞也舉國殺之也○左氏傳州吁未能和其民

厚問定君於石子石子曰王艷為可曰何以得艷曰陳桓公方有寵於王陳衛方睦若朝陳使請必可得也厚

從州吁如陳石碯使告于陳曰衛國褊小老夫耄矣無能為也此二人者實弑寡君敢即圖之陳人執之而請

泣於衛九月衛人使右宰醜泣殺州吁于濮石碯使其  
宰孺羊肩泣殺石厚于陳君子曰石碯純臣也惡州吁  
而厚與焉大義滅親其是之謂乎公羊傳其稱人何討  
賊之辭也穀梁傳稱人以殺殺有罪也祝吁之挈失嫌  
也其月謹之也于濮者譏失賊也胡氏傳伐鄭稱人責  
辭也殺州吁稱人衆詞也知然者伐鄭之後公孫文仲  
為主將而變文稱人則是指國人聽州吁號令從文仲  
而南行者也故曰責詞其殺州吁則石碯謀之而使右  
宰醜泣也變文稱人則是人皆有欲討賊之心亦夫人  
之所得討也故曰衆詞公羊子曰稱人者何討賊之辭  
也其義是矣于濮者閔衛國之人著諸侯之罪也衛人  
失賊而曰著諸侯之罪何也夫州吁二月弑君而不能  
即討者緣四國連兵欲定其位故久然後能殺之于濮  
爾非諸侯之罪而何夫以討賊許衆人而以失賊罪隣  
國與賊者寡矣故曰春  
冬十有二月衛人立晉  
晉衛莊  
秋成而亂臣賊子懼

桓公弟也衛人立之是為宣公程子曰諸侯之立必受命於天子當時雖不受命於天子猶受命於先君衛人以晉乃公子也可以立故立之春秋所不與也雖先君子孫不由天子與先君之命不可立○左氏傳衛人逆公子晉于邢宣公即位書曰衛人立晉衆也公羊傳晉者何公子晉也立者何立者不宜立也其稱人何衆立之之辭也然則孰立之石碯立之石碯立之則其稱人何衆之所欲立也衆雖欲立之其立之非也穀梁傳衛人者衆詞也立者不宜立者也晉之名惡也其稱人以立之何也得衆也得衆則是賢也賢則其曰不宜立何也春秋之義諸侯與正而不與賢也胡氏傳人衆詞立者不宜立也晉雖諸侯之子內不承國於先君上不稟命於天子衆謂宜立而遂自立焉可乎故春秋於衛人特書曰立所以著國置其君之罪於晉絕其公子所以明專有其國之非以此垂法而父子君臣之義明矣未有為子而不受之父也未有為諸侯而不受之王也

癸亥 五年春公矢魚于棠

矢當作觀三傳皆曰觀棠即唐也今濟寧路濟州魚臺縣有觀

魚臺程子曰諸侯非王事民事不遠出遠出觀魚非道也○左氏傳臧僖伯諫曰凡物不足以講大事其材不足以及備器用則君不舉焉君將納民於軌物者也故講事以度軌量謂之軌取材以章物采謂之物不軌不物謂之亂政亂政亟行所以敗也故春蒐夏苗秋獮冬狩皆於農隙以講事也三年而治兵入而振旅歸而飲至以數軍實昭文文章明貴賤辨等列順少長習威儀也鳥獸之肉不登於俎皮革齒牙骨角毛羽不登於器則公不射古之制也若夫山林川澤之實器用之資阜隸之事官司之守非君所及也公曰吾將略地焉遂往陳魚而觀之僖伯稱疾不從書曰公矢魚于棠非禮也且言遠地也公羊傳何以書譏何譏爾遠也公曷為遠而觀魚登來之也百金之魚公張之登來之者何美大之辭也棠者何濟上之邑也穀梁傳常事曰視非常曰觀

禮尊不親小事卑不尸大功魚卑者之事也公觀之非  
正也胡氏傳齊景公問於晏子吾欲觀於轉附朝舞遵  
海而南放於琅瑯吾何修而可以比於先王觀也對曰  
天子適諸侯曰巡狩巡所守也諸侯朝於天子曰述職  
述所職也無非事者春省耕而補不足秋省斂而助不  
給是故諸侯非王事則不出非民事則不出今隱公慢  
棄國政遠事逸遊僖伯之忠言不見納亦已矣又從而  
為之辭是縱欲而不能自克之以禮也能無鐘巫之及  
乎特書觀夏四月葬衛桓公而後葬程子曰衛亂是以

魚譏之也

夏四月葬衛桓公

而後葬程子曰衛亂是以

緩稱桓公見國人私謚也魯往會故書送終大事也必  
就正寢不沒於婦人之手曾子易簣而沒豈苟然乎死  
而加之不正之謚知忠孝者肯為乎○左氏傳衛亂是  
以緩穀梁傳月葬故也胡氏曰衛亂是以緩魯往會故  
書聖人存而弗削者弑逆之賊討矣謚者行之跡所以  
紀實德垂勸戒也名之曰幽厲雖孝子慈孫百世不能

改失位而見弑何以爲桓列爵惟五皆王命也衛本侯  
爵何以稱公見臣子不請於王而私自謚爾程氏曰送  
終大事也必於正寢而不沒於婦人之手豈苟然乎死  
而加之以不正之謚知忠孝者不忍爲也春秋於邦君薨  
正以王法而書卒至於葬則從其私謚而稱公或革或  
因前以貶不臣順之諸侯後以罪不忠孝之臣子詞顯  
而義微皆所以過人秋衛師入郕郕姬姓伯爵國在今濟寧路單州任城縣  
欲存天理大居正也衛師將卑師衆也程子曰衛晉乘亂得立不思安國保  
民之道以尊王爲先居喪爲重乃興戎修怨入人之國  
書其失道也○左氏傳衛之亂也郕人侵衛故衛師入  
郕公羊傳曷爲或言率師或不言率師將尊師衆稱某  
率師將尊師少稱將將卑師衆稱師將卑師少稱人君  
將不言率師書其重者也穀梁傳入者內弗受也郕國  
也將卑師衆曰師胡氏傳稱師者紀其用衆而立義不  
同有矜其盛而稱師者如齊師宋師曹師城邢之類是

也有著其暴而稱師者楚滅陳蔡公子棄疾主兵而曰  
楚師之類是也有惡其無名不義而稱師者次于即以  
俟陳蔡及齊圍邲之類是也衛宣繼州吁暴亂之後不  
施德政固本恤民而毒衆臨戎入人之國失君道矣書  
衛師入邲九月考仲子之宮初獻六羽考始成而祭也  
仲子惠公妾桓  
著其暴也  
公母也非夫人故不祔廟而別祀初始也六羽六佾也  
婦人無武功故獻羽而不舞于朱子曰佾舞列也天子  
八諸侯六大夫四士二程子曰諸侯無再娶仲子不得  
為夫人春秋之初尚以為疑故別宮以祀之考始成而  
祀也書之以見非禮成王賜魯用天子禮樂祀周公後  
世遂羣廟皆用仲子別宮故不敢同羣廟而用六羽也  
書初獻見前此用八之僭也仲尼以魯之郊禘為周公  
之道衰用天子之禮樂祀周公成王之過也○左氏傳  
將萬焉公問羽數於衆仲對曰天子用八諸侯用六大  
夫四士二夫舞所以節八音而行八風故自八以下公

從之於是初獻六羽始用六佾也公羊傳考宮者何考  
猶入室也始祭仲子也桓未君則曷為祭仲子隱為桓  
立故為桓祭其母也然則何言爾成公意也初獻六羽  
初者何始也六羽者何舞也初獻六羽何以書譏何譏  
爾譏始僭諸公也六羽之為僭奈何天子三公稱公八佾諸公六  
諸侯四諸公者何諸侯者何天子三公稱公王者之後  
稱公其餘天子之相則何以三自陝而東者周公主之  
子之相也天子之相則何以三自陝而東者周公主之  
自陝而西者召公主之一相處乎內始僭諸公昉於此  
乎前此矣前此則曷為始乎此僭諸公猶可言也僭天  
子不可言也穀梁傳考者何也考者成之也成之為夫  
人也禮庶子為君為其母築宮使公子主其祭也於子  
祭於孫止仲子者惠公之母隱孫而修之非隱也初獻  
六羽初始也穀梁子曰舞夏天子八佾諸公六佾諸侯  
四佾初獻六羽始僭樂矣尸子曰舞夏自天子至諸侯  
皆用八佾初獻六羽始厲樂矣胡氏傳考者始成而祀



也其稱仲子者惠公欲以愛妾為夫人隱公欲以庶弟為嫡子聖人以為諸侯不再娶於禮無二適孟子入惠公之廟仲子無祭享之所為別立宮以祀之非禮也故因其來賁而正名之曰仲子之賁因其考宮而正名之曰仲子之宮而夫人衆妾之分定矣隱公攝讓之實辨矣桓公篡弑之罪昭矣存則以氏繫姓以姓繫號沒則以謚繫號以姓繫謚者夫人也存不稱號沒不稱謚單舉姓字者妾也凡宮廟非志災失禮則不書初獻六羽者始用六佾也不謂之佾而曰羽者佾干羽之惣稱也羽以象文德干以象武功婦人無武事則獨奏文樂故謂之羽而不曰佾也初者事之始魯僭天子之禮樂舊矣是成王過賜而伯禽受之非也用於大廟以祀周公已為非禮其後羣公皆僭用焉仲子以別宮故不敢同羣廟而降用六羽書初獻者明前此用八之僭也諸侯僭於上大夫僭於下故其末流季氏八佾舞於庭而三家者以雍徹上下無復辨矣聖人因事而書所以正天

下之邾人鄭人伐宋

先鄭程子曰宋人取邾田邾人告

於鄭曰請君釋恨於宋敝邑為道先邾人邾為主也左

氏傳宋人取邾田邾人告於鄭曰請君釋憾於宋敝邑

為道鄭人以王師會之伐宋入其郛以報東門之役宋

人使來告命公聞其入郛也將救之問於使者曰師何

及對曰未及國公怒乃止辭使者曰君命寡人所敢知也

稷之難今問諸使者曰師未及國非寡人之所敢知也

胡氏傳案左氏宋人取邾田邾人告於鄭曰請君釋憾

於宋敝邑為道則主兵者邾也故雖附庸小國而序乎

鄭之上凡班序上下以國之小大從禮之常也而盟會

征伐以主者先因事之變也然則衛州吁告於宋以伐

鄭事與此同而聖人以宋為主者何此春秋撥螟蟲食

亂之大法也凡誅亂臣討賊子必深絕其黨螟蟲食

者曰螟蓋蝗之屬也害稼為災故書程子曰書螟書蟲

皆為災也國之大事故書○公羊傳何以書記災也穀

梁傳蟲災也甚則月不甚則時胡氏傳蟲食苗心曰螟食葉曰螾螾食節曰賊食根曰蝱國以民為本民以食為先詩去螟螾害稼也春秋書螟記災也聖人以是為國之大事也故書而近世王安石乃稱為人牧者不必論秦災傷之事亦獨何哉甚矣其不講於聖人之經以欺當年而誤天下與來世也

冬十有二月

辛巳公子彊卒

魯孝公子名彊謚僖伯後為臧氏即臧僖伯也○左氏傳臧僖伯卒公曰叔父

有憾於寡人寡人弗敢忘葬之加一等穀梁傳隱不爵命大夫其曰公子彊何也先君之大夫也胡氏傳案左氏臧僖伯卒公曰叔父有憾於寡人寡人弗敢忘葬之加一等以公羊三世考之則所傳聞之世也而書日見恩禮之厚明矣公將如棠觀魚者僖伯諫而不聽則稱疾不從可謂忠臣矣葬之加一等夫是之謂稱然隱公不敢忘其忠而不能聽其言與郭公善宋人伐鄭圍長善而不能用於亡國一也其及宜矣

宋人伐鄭圍長

葛

圍者以兵縲其城邑也長葛鄭邑今汴梁路許州長葛縣報復之師也程子曰伐國而圍邑肆其暴也○

左氏傳以報入郭之役也公羊傳邑不言圍此其言圍何彊也穀梁傳伐國不言圍邑此言圍何也久之也伐不踰時戰不逐奔誅不填服苞人民毆牛馬曰侵斬樹木壞宮室曰伐胡氏傳圍者縲其城邑絕其往來之使禁其樵採之途城守不下至於經年而不解誅亂臣討賊子可也長葛鄭邑何罪乎書圍於此而書取於後宋彰矣人之惡

甲子六年春鄭人來渝平

鄭人一命之微者也趙先生曰渝變也渝平變仇而更和平也

隱公為太子時與鄭戰于狐壤為鄭所獲四年與宋衛同伐鄭則是與鄭為仇也而五年鄭伐宋入郭宋來求救行人失辭公怒遂不出師鄭因而來通好釋怨至八年而歸祊十年遂會齊鄭伐宋若曰絕交則二年之間

何以又來歸昉乎公穀渝作輸胡氏亦然程子曰魯與鄭修舊好旣而迫於宋衛遂與之同伐鄭故鄭來絕交渝平變其平也匹夫且不肯失信於人爲國君而負約可羞之甚也○左氏傳更成也公羊傳輸平者何輸平猶墮成也何言乎墮成敗其成也曰吾成敗矣吾與鄭人未有成也吾與鄭人則曷爲未有成孤壤之戰隱公獲焉然則何以不言戰諱獲也穀梁傳輸者墮也平之爲言以道成也來輸平者不果成也胡氏傳輸者納也平者成也鄭人曷爲納成于魯以利相結解怨釋仇離宋魯之黨也公之未立與鄭人戰于孤壤止焉元年及宋盟于宿四年遇于清其秋會師伐鄭即宋魯爲黨與鄭有舊怨明矣五年鄭人伐宋入其郭宋來告命魯欲救之使者失詞公怒而止其冬宋人伐鄭圍長葛鄭伯知其適有用閒可乘之隙也是以來納成耳然則善之乎曰平者解怨釋仇固所善也輸平者以利相結則貶矣曷爲知其相結之以利也後此鄭伯使宛來歸昉而

魯入其地會鄭人伐宋得郛及防而魯又取其二邑是知輸平者以利相結乃貶之也諸侯修睦以蕃王室所主者義爾苟為以利使為臣者懷利以事其君為人子者懷利以事其父為人弟者懷利以事其兄諸侯必曰何以利吾國大夫必曰何以利吾家士庶人必曰何以利吾身上下交征利不至於篡弑奪攘則不厭矣故特稱輸平以明有國者必正其義

夏五月辛酉公會齊侯

盟于艾

艾杜氏曰齊地今益都路寧海州牟平縣有艾山書會盟齊為主也程子曰始平于齊也左氏

傳始平于齊也

秋七月

程子曰雖無事必書首月以備四時而成歲也胡氏傳四德備而後為乾故易

曰乾元亨利貞一德不備則乾道熄矣四時具而後成歲故春秋雖無事首時過則書一時不具則歲功虧矣既書時又書月者時天時也月王月也書時又書月見天人之理合也易不云乎君子行此四德者故曰乾元

亨利貞若夫上下異致天人殊  
觀聖學不傳而春秋之義隱矣  
冬宋人取長葛程子曰宋人之

圍長葛歲且周矣其虐民無道之甚而天子弗治方伯  
弗征鄭視其民之困危而不能保有赴訴卒喪其邑皆  
罪也宋之彊取不可勝誅矣○公羊傳外取邑不書此  
何以書久也穀梁傳外取邑不志此其志何也久之也  
胡氏傳宋人恃彊圍邑久役大衆取非所有其罪著矣  
在王朝不能施九伐之威在列國不能修連帥之職鄭  
人土地天子所命先君所受不能保有而失之也是上  
無天王下無方伯而鄭亦無君也宋人彊取以王法言  
不可勝誅以天理言不善之積著矣初穆公屬國於與  
夷使其子馮出居于鄭殤公既立忌馮而伐鄭不亦逆  
天理乎春秋序宋主兵以殤公之罪重也明年鄭人報  
宋序邾為首以鄭伯之罪輕也至是宋又舉兵伐鄭而  
圍其邑肆行暴虐不善之積已著而不可解矣其見弑  
於亂臣豈一朝一夕之故哉凡此類皆直書于策案其

行事而善惡之應可攷  
而知天理之不誣者也

乙丑七年春王三月叔姬歸于紀叔姬魯女伯姬之媵也

為紀侯夫人叔姬其娣也待年於家今始歸娣歸不書  
今書之憫其無終也○穀梁傳其不言逆何也逆之道  
微無足道焉爾胡氏傳叔姬伯姬之娣非夫人也則何  
以書古者諸侯一娶九女必格之同時者所以定名分  
室亂源也今叔姬待年於宗國不與嫡俱行則非禮之  
常所以書也眉山蘓轍以謂書叔姬賢之也若賢不得  
書必貴而後書則是以位而蔑德也小國無大夫至於  
接我則書是位不可以廢事也位不可以廢事而獨可  
以廢賢乎如叔姬不歸宗國而歸于鄫以全  
婦道賢可知矣賢而得書示春秋之法也  
**滕侯卒**滕姬

姓侯爵後國削弱自改子爵國在今益都路滕州不書  
日不書名闕文也書卒不書葬來赴而魯不會葬也程



子曰不名史闕也○左氏傳不書名未同盟也凡諸侯  
同盟於是稱名故薨則赴以名告終稱嗣也以繼好息  
民謂之禮經公羊傳何以不名微國也微國則其稱侯  
何不嫌也春秋貴賤不嫌同號美惡不嫌同辭穀梁傳  
滕侯無名少曰世子長曰君狄道也其不正者名也胡  
氏傳滕侯書卒何以不葬怠於禮弱其君而不葬者滕  
侯宿男之類是已古者邦交有常制不以國之彊弱而  
有謹慢也不以情之疎密而有厚薄也春秋之時則異  
於是晉北國也楚南郊也地非同盟而親往侯其葬滕  
鄰境也宿同盟也訃告雖及而曾不之恤豈非以其壤  
地褊小乎怠於禮而不往弱其君而不會無其事而闕  
其文此魯史之舊也聖人無加損焉存其卒闕其葬義  
自見矣卒自外錄不卒非外  
**夏城中丘**城完修舊城也  
中丘杜氏曰魯  
也葬自內錄不葬非內也  
地今益都路密州安丘縣程子曰為民立君所以養之  
也養民之道在愛其力民力足則生養遂生養遂則教

化行而風俗美故為政以民力為重也春秋凡用民力必書其所興作不時害義固為罪也雖時且義必書見勞民為重事也後之人君知此義則知慎重於用民力矣然有用民力之大而不書者為教之意深矣僖公修泮宮復闕宮非不用民力也然而不書二者復古興廢之大事為國之先務如是而用民乃所當用也人君知此義則知為政之先後輕重矣凡書城者完舊也書築者創始也書城中丘使民不以時非人君之用心也後倣此○左氏傳書不時也公羊傳中丘者何內之邑也城中丘何以書以重書也穀梁傳城為保民為之也民衆城小則益城益城無極凡城之志皆譏也胡氏傳程氏曰為民立君所以養之也養民之道在愛其力民力足則生養遂教化行風俗美故為政以民力為重也春秋凡用民必書其所興作不時害義固為罪矣雖時且義亦書見勞民為重事也人君而知此義則知慎重於用民力矣凡書城者完舊也書築者創始也城中丘使

民不以時非齊侯使其弟年來聘

年齊僖公弟夷仲年也未命例書弟來聘

以幣通好於魯也程子曰凡不稱公子而稱弟者或責其失兄弟之義或罪其以弟之愛而寵任之過也左氏

公羊傳皆曰年齊僖公之母弟先儒母弟之說蓋緣禮文有立嫡子同母弟之說其曰同母弟蓋謂嫡爾非以

同母為加親也若以同母為加親是不知人理近於禽道也天下不明斯義也久矣僖公愛年其子尚禮秩如

嫡卒致篡弑之禍書弟見其以弟之愛而寵任之過也○左氏傳結艾之盟也公羊傳其稱弟何母弟稱弟母

兄稱兄穀梁傳諸侯之尊弟兄不得以屬通其弟云者以其來接於我舉其貴者也胡氏傳兄弟先公之子不

稱公子貶也書盟書帥師而稱兄弟者罪其有寵愛之私書出奔書歸而稱兄弟者責其薄友愛之義攷於事

而春秋之情可見矣年者齊僖公母弟也程氏謂先儒說母弟者蓋緣禮有立嫡子同母弟之文其曰同母蓋

為嫡爾非以為加親也此義不明久矣僖公私其同母寵愛異於他弟施及其子猶與適等而襄公紂之遂成篡弑之禍故聖人於年來聘特變文書弟以示貶焉鄭語來盟黑背帥師皆罪其私也書云于弟弗念天顯乃弗克恭厥兄兄亦不念鞠子哀大不友于弟天惟與我民彝大泯亂陳光奔楚而稱弟不念鞠子哀矣盜殺衛絜而稱兄其亦不念天顯矣秦鍼宋辰皆責其薄也仁人於兄弟絕偏絜之私篤友恭之義人倫正而天理存其春秋以訓天下

**秋公伐邾**為宋討也君親將例書爵與來世之義也

**程子曰案左氏傳為宋討也擅興甲兵為人而伐人非義之甚也**○左氏傳為宋討也胡氏傳奉辭致討曰伐案左氏公伐邾為宋討也宋人先取邾田故邾人入于郛魯與儀父則元年盟于昧矣邾人何罪可聲特託為辭說以伐之爾經之書伐非主兵者皆有言可執見伐者皆有罪可討也傳曰欲加之罪何患無辭魯為宋討非義甚矣而稱伐邾所謂

欲加之罪者也而不知渝  
昧之盟不待貶而自見矣  
冬天王使凡伯來聘戎伐凡

伯于楚丘以歸

天王周桓王也來聘以幣貺於魯也凡姬姓伯爵國在今衛輝路新鄉縣凡伯

諸侯為王朝卿士者也戎陸渾之戎也地在今河南府路洛川縣陸渾山楚丘杜氏曰衛地今東昌路曹州楚

丘縣左氏公羊皆曰戎執凡伯獨穀梁以衛為戎啖氏曰若衛實執天子之使而改曰戎是為衛掩惡也宜以

左氏公羊為是程子曰周禮時聘以結諸侯之好諸侯不修臣職而聘之非王體也楚丘衛地伐見其以衆天

子之使道由於衛而戎得以衆伐之衛不能救其罪可知言以歸則非執而凡伯亦有失節之罪也○左氏傳

初戎朝于周發幣于公卿凡伯弗賓冬王使凡伯來聘還戎伐之于楚丘以歸公羊傳凡伯者何天子之大夫

也此聘也其言伐之何執之也執之則其言伐之何大之也曷為大之不與夷狄之執中國也其地何大之也

穀梁傳凡伯者何也天子之大夫也國而曰伐此一人而曰伐何也大天子之命也戎者衛也戎衛者為其伐天子之使貶而戎之也楚丘衛之邑也以歸猶愈乎執也胡氏傳國而曰伐此一人而曰伐見其以徒衆也楚丘衛地以歸易詞也于楚丘者罪衛不救王臣之患以歸者罪凡伯失節不能死於位也周之秩官敵國賓至關尹以告候人為導司徒司寇詰姦佞人積薪火師監燎其貴國之賓至則以班加一等益虔至於王吏則皆官正蒞事今凡伯承王命以為過賓於衛而戎得伐之以歸是蔑先王之官而無君父也故旄丘錄於國風見衛不能修方伯之職也戎伐凡伯于楚丘以歸見衛不救王臣之患也為狄所滅則有由矣

丙寅八年春宋公衛侯遇于垂

遇無諸侯相見之禮也垂杜氏曰衛地太丘也今東

昌路曹州濟陰縣有垂亭○左氏傳齊侯將平宋衛有會期宋公以幣請於衛請先相見衛侯許之故遇于太

丘穀梁傳不期而會  
曰遇遇者志相得也  
三月鄭伯使宛來歸祊庚寅我入

祊

宛鄭大夫名再命例書名祊鄭朝宿之邑今益都路沂州費縣也古費廢城在縣西北來歸祊以祊與魯

也鄭蓋欲以祊易許而魯受之聖人以魯受之不順故特書入程子曰魯有朝宿之邑在王畿之內曰許鄭有

朝宿之邑近於魯曰祊時王政不修天子不巡狩魯亦不朝鄭欲以祊易許田各取其近者故使宛來歸祊始

以祊歸魯未言易也朝宿之邑先祖受之於先王豈可相易也鄭來歸而魯受之其罪均也入者內弗受也義

不可而彊入之也○左氏傳鄭伯請釋泰山之祀而祀周公以泰山之祊易許田三月鄭伯使宛來歸祊不祀

泰山也公羊傳宛者何鄭之微者也邠者何鄭湯沐之邑者也天子有事於泰山諸侯皆從泰山之下諸侯皆

有湯沐之邑焉其言入何難也其日何難也其言我何言我者非獨我也齊亦欲之穀梁傳名宛所以貶鄭伯

惡與地也入者內弗受也日入惡入者也邠者鄭伯所  
受命於天子而祭泰山之邑也胡氏傳鄭伯欲以太山  
之祊易許田前此來輸平者以言請之矣未入地也至  
是來歸祊者其地既輸矣未易許也周制六年五服一  
朝故於天子之郊有朝宿之地又六年王乃時巡諸侯  
各朝于方嶽故於太山之旁有湯沐之邑諸侯於王畿  
之內方岳之下皆有是乎成王以周公有大勲勞故特  
賜之許田為朝宿之地如皆有焉盡天子之郊不足為  
其地矣宣王以鄭伯母弟懿親故特賜之祊田為湯沐  
之邑如皆有焉盡太山之旁不足為其邑矣祊近於魯  
許隣於鄭各以其近者相易何以不可乎用是見鄭有  
無君之心而謂天王不復能巡狩矣用是見鄭有無親  
之心而敢與人以先祖所受之邑矣其言我入祊者  
祊非我有也入者不順之詞義不可而彊入之也夏

# 六月己亥蔡侯考父卒

蔡宣公名考父子封人立是為桓公○穀梁傳諸侯日卒正也



辛亥宿男卒

同盟故來赴不名缺文也元年及宋人盟而穀梁以為未能同盟誤矣○穀梁傳宿

微國也未能同盟故男卒也胡氏傳天王崩告於諸侯則不名諸侯薨以名赴而自別於太上禮也古者死而

不謚不以名為諱周人以謚易名於是乎有諱禮故君薨赴於他國則曰寡君不祿敢告執事春秋之時遵用

此禮凡赴者皆不以名矣經書其終雖五霸彊國齊桓晉文之盛莫不以名者是仲尼筆之也赴不以名而書

其名者與魯通也已通而不名者舊史失之爾未通而名者有所證矣故傳此義者記於禮篇曰諸侯不生名

夫生則不名死則名之別於太上示君臣尊卑之等蓋禮之中也諸侯薨赴不以名而仲尼革之必以名書變

周制矣春秋魯史聖人修之秋七月庚午宋公齊侯衛也而孟子謂之作以此類也

侯盟于瓦屋

宋主盟故先序參盟始於此瓦屋杜氏曰周地今東昌路博平縣程子曰宋為主也

盟與鄭絕也○左氏傳以釋東門之役禮也齊侯使來告成三國公使衆仲對曰君釋三國之圖以鳩其民君之惠也寡君聞命矣敢不承受君之明德穀梁傳外盟不日此其日何也諸侯之參盟於是始故謹而日之也誥誓不及五帝盟詛不及三王交質子不及二伯胡氏傳程氏曰宋為主盟與鄭絕也大道隱而家天下然後有誥誓忠信薄而人心疑然後有詛盟盟詛煩而約劑亂然後有交質子至是傾危之俗成民不立矣春秋革薄從忠於參盟書曰謹其始也周官設司盟掌盟載之法凡邦國有疑則請盟於會同聽命於天子亦聖人待哀世之意爾德又下衰諸侯放恣其屢盟也不待會同其私約也不繇天子口血未乾而渝盟者有矣其末至於交質子猶有不信者焉春秋謹參盟善胥命美蕭魚之會以信待人而不疑也蓋有志於天下為公之世凡此類亦變

八月葬蔡宣公

程子曰速也諸侯五月而葬不及期簡也○公羊傳卒何

以名而葬不名卒從正而葬從主人卒何以日  
而葬不日卒赴而葬不告穀梁傳月葬故也  
九月辛

卯公及莒人盟于浮來

稱及內為主也莒人微者也浮來杜氏曰紀地東莞縣有包來

山在今益都路沂州程子曰隣國之交講好修睦可也  
安用盟為公屈己與臣盟義非安也○左氏傳以成紀  
好也公羊傳公曷為與微者盟稱人則從不疑也穀梁  
傳可言公及人不可言公及大夫胡氏傳莒小國人微  
者而公與之盟故特言及以譏失禮且明非大夫之罪  
也易曰謙尊而光卑而不可踰隱公可謂謙矣何以譏  
之為失禮曰謙亨君子以裒多益寡稱物平施屈千乘  
之尊下與小國之大夫盟宣稱物平施之謂乎太卑而  
可踰非冥蟲為災也國以民為本民以食為天蟲害稼  
謙德矣螟則民將缺食矣此國之大故也凡螟螣螽蟃  
皆害稼者也故悉書之程子冬十有二月無駭卒無駭  
曰民以食為命故有災必書

子為大夫者也再命例書名胡氏以為未賜族非也柔  
挾溺之類皆再命者也○左氏傳羽父請諡與族公問  
族於衆仲衆仲對曰天子建德因生以賜姓胙之土而  
命之氏諸侯以字為諡因為族官有世功則有官族  
邑亦如之公命以字為展氏公羊傳此展無駭也何以  
不氏疾始滅也故終其身不氏穀梁傳無駭之名未有  
聞焉或曰隱不爵大夫也或說曰故貶之也胡氏傳無  
駭書名未賜族也諸侯之子為大夫則稱公子其孫也  
而為大夫則稱公孫公孫之子與異姓之臣未賜族而  
身為大夫則稱名無駭俠之類是也已賜族而使之世  
為大夫則稱族如仲孫叔孫季孫之類是也古者置卿  
必求賢德不以世官春秋之初猶為近古故無駭與俠  
皆書名爾其後官人以世無不賜之族或以字或以諡  
或以官或以邑而先王之禮亡矣至於三家專魯六卿  
分晉諸侯失國出奔者相繼職此由也案禮天子冢內  
諸侯世其祿而不嗣然則諸侯所置大夫嗣其位而不

易豈禮也哉觀春秋所書而是  
非之迹著矣治亂之效明矣

丁卯九年春天王使南季來聘

南氏季字周大夫例書字程子曰周禮

大行人時聘以結諸侯之好王法之行時加聘問以褒  
撫諸侯乃常禮也春秋之時諸侯不修臣職朝覲之禮  
廢絕王法所當治也不能正典刑而反聘之又不可答  
失道甚矣○穀梁傳南氏姓也季字也聘問也聘諸侯  
非正也胡氏傳案周禮行人王者待諸侯有時聘以結  
好間問以諭志而穀梁子何以獨言聘諸侯非正也古  
者諸侯於天子比年一小聘三年一大聘五年一朝天  
子於諸侯不可以若是愬故亦有聘問之禮焉隱公即  
位九年於此而史策不書遣使如周則是未嘗聘也亦  
不書公如京師則是未嘗朝也一不朝則貶其爵再不  
朝則削其地如隱公者貶爵削地可也刑則不舉遣使  
聘焉其斯以為不正乎經書公如京師者一朝于王所

者二卿大夫如京師者五舉魯一國則天下諸侯怠慢  
不臣可知矣書天王來聘者七錫命者三贈葬者四則  
問於他邦及齊晉秦楚之大國又可知矣王之不王如  
此征伐安得不自諸侯出乎諸侯之不臣如此政事安  
得不自大夫出乎君臣上下之分易矣其所由來非一  
朝一夕之故其原皆自天王失威福之柄也春秋於此  
蓋有不得已三月癸酉大雨震電庚辰大雨雪也震雷  
已馬爾矣

電雷之光也大雨雪亦非常也既雷電大雨矣又復大  
雨雪此八日之間陰陽失節書之以紀異朱子曰陰氣  
凝聚在內者不得出則奮擊而為雷陽氣伏陰之內不  
得出則爆開而為電陰陽蒸鬱而成雨陽和陰則為雪  
也程子曰陰陽運動有常而無忒凡失其度皆人為感  
之也故春秋災異必書漢儒傳其說而不達其理故所  
言多妄三月大雨震電不時災也大雨雪非常為大亦  
災也○左氏傳大雨霖以震書始也大雨雪亦如之書

時失也凡雨自三日以往為霖平地尺為大雪公羊傳大雨震電何以書記異也何異爾不時也大雨雪何以書記異也何異爾叔甚也穀梁傳震雷也電霆也大雨雪志䟽數也八日之間再有大變陰陽錯行故謹而日之也雨月志正也胡氏傳震電者陽精之發雨雪者陰氣之凝周三月夏之正月也雷未可以出電未可以見而大雨雪此陰氣縱也夫陰陽運動有常而無忒凡失其度人為感之也今陽失節而陰氣縱公子翬之讒兆矣鍾巫之難萌矣春秋災異必書雖不言其事應而事應具存惟明於天人相感之際響挾卒再命例書名與應之理則見聖人所書之意矣

**挾卒**

再命例書名與

無駭柔溺同不日缺文也○公羊傳俠者何吾大夫之未命者也穀梁傳俠者所俠也弗大夫者隱不爵大夫

也隱之不爵大夫何

**夏城郎**

郎杜氏曰魯地今濟寧路鉅野縣程子曰不時也○

左氏傳書不時也胡氏傳城者禦暴保民之所而城有制役有時大都不過三國之一邑無百雉之城制也魯嘗城費城郈其後復墮焉則越禮而非制矣凡土功龍見而戒事火見而致用水昏正而裁日至而畢時也隱公城中丘城郎而皆以夏則妨農務而非時矣城不踰制役不違時又當分財用平板榦稱畚築程土物議遠邇略基址揣厚薄仞溝洫具糗糧度有司量功命日不愆於素然後為之可也况失其時制妄興大作無愛養斯民之意者其**秋七月**無事例書時書首月穀梁傳罪之輕重見矣**冬**無事焉何以書不遺時也

**公會齊侯于防**

防杜氏曰魯地今益都路沂州費縣防田也左氏傳謀伐宋也穀梁傳會者外

為主焉爾胡氏傳周官行人曰時會以發四方之禁此謂非時而合諸侯以禁止天下之不義也列國何為有此名凡書會皆譏也謂非王事相會聚爾左氏稱宋公不王鄭伯以王命討之使來告命會于防謀伐宋也于



中丘為師期也亦謂之非王事可乎曰以王命討宋而聽征討之禁於王都雖召陵之舉不是及矣始則私相會為謀於防中則私相盟為師期於鄧終則乘敗人而深為利以取二邑歸諸己奉王命討不庭者果如是乎經之書會書伐而不異其文以此

戊辰十年春王二月公會齊侯鄭伯于中丘

左氏傳為師期

夏

帥師會齊人鄭人伐宋

趙先生曰羽父專帥師衆至於再其無君之心所由來者漸矣

程子曰三國先遣師致伐齊鄭稱人非卿也○左氏傳夏五月羽父先會齊侯鄭伯伐宋公羊傳此公子翬也何以不稱公子貶曷為貶隱之罪人也故終隱之篇貶也胡氏傳翬不氏先期也始而會宋以伐鄭固請而行今而會鄭以伐宋先期而往不待鍾巫之變知其有無君之心矣夫亂臣賊子積其彊惡非一朝一夕之故及

權勢已成威行中外雖欲制之其將能乎故  
去其公子以戒兵柄下移制之於未亂也

六月壬戌

公敗宋師于管辛未取郕辛巳取防

敗奇詐以取勝也  
宋師將卑師衆也

管杜氏曰宋地今河南府路歸德府睢陽縣取悉虜而  
俘之也郕宋邑今東昌路曹州城武縣南郕城也防亦  
宋邑今益都路濰州昌邑縣西防城也程子曰不言戰  
而言敗敗之者為主彼與戰而此敗之也取二邑而有  
之盜也○左氏傳君子謂鄭莊公於是乎可謂正矣以  
王命討不庭不貪其土以勞王爵正之體也公羊傳取  
邑不日此何以日一月而再取也何言乎一月而再取  
甚之也內大惡諱此其言甚之何春秋錄內而略外於  
外大惡書小惡不書於內大惡諱小惡書穀梁傳取邑  
不日此其日何也不正其乘敗人而深為利取二邑故  
取而日之也胡氏傳內大惡其詞婉小惡直書而不隱  
夫諸侯分邑非其有而取之盜也曷不隱乎於取之中

猶有重馬者若成公取鄆襄公取郛昭公取鄆皆覆人之邦而絕其嗣亦書曰取所謂猶有重馬者也此故取鄆取防直書而不隱也其不言戰而言敗敗者為主彼與戰而此敗之也皆陳曰戰詐戰曰敗

秋宋人

衛人入鄭宋人蔡人衛人伐戴鄭伯伐取之

諸國稱人將卑師少

也鄭伯自將也戴爵姓俱闕國在今汴梁路封丘縣程子曰鄭勞民以務外而不知守其國故二國入之戴鄭所與也故三國伐之鄭戴合攻盡取三國之衆其殘民也甚矣○左氏傳鄭伯圍戴克之取三師焉宋衛旣入鄭而以伐戴召蔡人蔡人怒故不和而敗公羊傳其言伐取之何易也其易奈何因其力也因誰之力因宋人蔡人衛人之力也穀梁傳不正其因人之力而易取之故主其事也胡氏傳稱伐稱取兼之也或疑鄭人兵力不能取戴兼三國之師非矣什圍伍攻正也以寡覆衆奇也莊公蓋嘗克叔段敗王師困州吁而入許能以奇

勝可知矣故駐師於郊多方以誤之也四國已闕起乘其弊一舉而兼取之卞莊子之術也然則可乎孟子曰善戰者服上刑稱伐取者其以冬十月壬午齊人鄭莊公殘民之甚當此刑矣

入郕齊鄭稱人將卑師少也程子曰討不會伐宋也宋以公子馮在鄭故二國交惡左氏傳曰宋公不王鄭伯以王命討之於經不見其為王討也王臣不行王師不出矯假以逞私忿爾○左氏傳討違王命也穀梁傳云宋公不王鄭伯以王命致討而郕人不曾齊鄭入郕討違王命也程氏謂宋本以公子馮在鄭故二國交惡春秋不見其為王討也王臣不行王師不出矯假以逞私忿爾此說據經為合若討違王命則不書日矣入者不順之詞也苟以為難詞則齊鄭大國於討郕何難哉

己十有一年春滕侯薛侯來朝

薛任姓侯爵國在今滕州之西沛縣之東來朝

朝魯也程子曰諸侯雖有相朝之禮而當時諸侯之於天子未嘗朝覲猶相率以朝魯得為禮乎○左氏傳爭長薛侯曰我先封滕侯曰我周之卜正也薛庶姓也我不可以後之公使羽父請於薛侯曰君與滕君辱在寡人之宗盟異姓為後寡人若朝於薛不敢與諸任齒君若辱貶寡人則願以滕君為請薛侯許之乃長滕侯○公羊傳其言朝何諸侯來曰朝大夫來曰聘其兼言之何微國也穀梁傳天子無事諸侯相朝正也考禮修德所以尊天子也諸侯來朝時正也植言同時也累數皆至也胡氏傳諸侯朝於諸侯禮乎孔子曰邦君為兩君之好有反玷周禮行人凡諸侯之邦交殷相聘世相朝也然謂之殷則得中而不過謂之世則終諸侯之世而一相朝其為禮亦節矣周衰典制大壞諸侯放恣無禮義

之交惟彊弱之視以魯事觀焉或來朝而不報其禮或屢往而不納以歸無合於中聘世朝之制矣且列國於天子迷所職者蓋闕如也而自相朝聘可乎凡大國來聘小國來朝一切書而不削皆所以示譏滕薛二君不特言者又譏旅見也非天子不旅見諸侯夏公會鄭伯偃然受之而不辭亦以見隱公之志荒矣

于時來

時來杜氏曰鄭地滎陽黎城今汴梁路鄭州滎陽縣有古黎城夏字下公穀有五月字程子曰

謀伐秋七月壬午公及齊侯鄭伯入許

許姜姓男爵國在今汴梁路許

州君親將故書爵程子曰書及內為主也非內為主則先書會伐後書入也○左氏傳鄭伯將伐許授兵於大

宮公孫闕與穎考叔爭車穎考叔挾輈以走子都拔棘以逐之及大逵弗及子都怒穎考叔取鄭伯之旗蝥弧

以先登子都自下射之顛瑕叔盈又以蝥弧登周麾而呼曰君登矣鄭師畢登遂入許許莊公奔衛齊侯以許

讓公公曰君謂許不共故從君討之許既伏其罪矣雖  
君有命寡人弗敢與聞乃與鄭人鄭伯使許大夫百里  
奉許叔以居許東偏曰天禍許國鬼神實不逞於許君  
而假手于我寡人寡人唯是一二父兄不能供億其敢  
以許自為功乎寡人有弟不能和協而使餉其口於四  
方其況能久有許乎吾子其奉許叔以撫柔此民也吾  
將使獲也佐吾子若寡人得沒於地天其以禮悔禍於  
許無寧茲許公復奉其社稷唯我鄭國之有請謁焉如  
舊婚媾其能降以相從也無滋他族實偪處此以與我  
鄭國爭此上也吾子孫其覆亡之不暇而況能禋祀許  
乎寡人之使吾子處此不唯許國之為亦聊以固吾圉  
也乃使公孫獲處許西偏曰凡而器用財賄無寘於許  
我死乃亟去之吾先君新邑於此王室而既卑矣周之  
子孫日失其序夫許大岳之胤也天而既厭周德矣吾  
其能與許爭乎君子謂鄭莊公於是乎有禮禮經國家  
定社稷序民人利後嗣者也許無刑而伐之服而舍之

度德而處之量力而行之相時而動無累後人可謂知禮矣胡氏傳書會則伐許者本鄭志也書及則入許者公所欲也隱公即位十有一年天王遣使來聘者再而未嘗朝于京師罪一也平王崩不奔喪會葬至使武氏子來求賻罪二也禮樂征伐自天子出而擅興甲兵為宋而伐邾為鄭而伐宋罪三也山川土田各有封守上受之天王下傳之先祖而取郕及防入祊易許田罪四也今又入人之國而逐其君罪五也凡此五不韙者人臣之大惡而隱公兼有之然則不善之殃宜特始於惠成於桓而隱之積亦不可得而掩矣使隱公者為國以禮而自彊於善宜有鍾巫之難乎是故春秋所載以人事言則是非善惡之迹施於前而成敗吉凶之效見於後以天道言則感應之

冬十有一月壬辰公薨

輟弒隱公而書


薨者何諱國惡也然不書地則其為見弒也亦明矣不書葬賊不討也左氏謂不書葬為不成喪於義未安宜



以公穀為是程子曰人君終於路寢見卿大夫而終乃  
正終也薨於燕寢不正而終也薨不書地弑也賊不討  
則不書葬無臣子也左氏傳羽父請殺桓公將以求大  
宰公曰為其少故也吾將授之矣使營菟裘吾將老焉  
羽父懼反譖公于桓公而請弑之初公之為公子也與  
鄭人戰于狐壤止焉鄭人囚諸尹氏賂尹氏而禱於其  
主鍾巫遂與尹氏歸而立其主公祭鍾巫齋於社圃館  
於寫氏羽父使賊弑公于寫氏立桓公而討寫氏有死  
者不書葬不成喪也公羊傳何以不書葬隱之也何隱  
爾弑也弑則何以不書葬春秋弑賊不討不書葬以為  
無臣子也子沈子曰君弑臣不討賊非臣也子不復讎  
非子也葬生者之事也春秋君弑賊不討不書葬以為  
不繫乎臣子也公薨何以不地不忍言也隱何以無正  
月隱將讓乎桓故不有其正月也穀梁傳公薨不地故  
也隱之不忍地也其不言葬何也君弑賊不討不書葬  
以罪下也隱十年無正隱不自正也元年有正所以正

隱也胡氏傳致隱讓國立不以正惠公之罪也致桓弑君幾不早斷隱公之失也既有讒人交亂其間憂虞之象著矣而曰使營莧裘吾將老焉是猶豫留時辨之弗早辨也其及也宜隱公見弑魯史舊文必以實書其曰公薨者仲尼親筆也古者史官以直為職而不諱國惡仲尼筆削舊史斷自聖心於魯君見弑削而不書者蓋史一官之守春秋萬世之法其用固不同矣不書弑子於君父有隱避其惡之禮不書地示臣子於君父有討賊復之義非聖人莫能修謂此類也夫賊不討讎不復而不書葬則服不除寢苦枕戈無時而終事也以此法討罪至嚴矣故曰春秋成而亂臣賊子懼

春秋集傳釋義大成卷一



覆校官庶吉士臣方燁

校對官檢討臣王鍾健

謄錄監生臣蔣予林